

清

史

稿

清史稿

列傳

忠義

清天命天聰年間明御史張銓監軍道張春均以被禽不屈聽其自盡載諸實錄風厲天下厥後以明臣來歸者有功亦入貳臣傳死軍事之尤烈者於京師祀昭忠祠褒貶嚴矣文武一二品以上既入大臣傳以下則另編忠義傳列翰林院職掌凡自一二品以下或死守土或死臨陣備載出身官階殉難時地及予謚建祠贈官廕後二百數十年綜八千餘人略以類別入關之先如降服烏喇哈達索倫葉赫諸部落爲特音珠等二十人是征朝鮮則勞漢等十人是其伐明也自天命三年至崇德八年始克撫順屢徧近畿分下山西山東諸郡縣尤以瀋陽大陵河皮島松山數役爲大爲西佛萊百六十二人是順治元年定鼎燕京後追擊流賊奠定各省者爲恩克伊等一千二百四十五人康熙朝討平逆藩及殲滅附逆諸鎮將爲索諾穆等九百四十七人親征噶爾丹之役爲富成額等百人厄魯特之役爲諾里爾達等五十五人羅刹西藏諸役爲紐默

淳等七人平各省土賊及海寇苗獠諸役先後爲郝爾德等二百八十五人雍正朝承康熙征厄魯特之役用兵準噶爾爲和溥等三百六十二人其先青海之役爲姬登第等十四人外則滇黔蜀桂土司苗亂與夫臺灣土番等役爲劉洪度等二百十三人乾隆朝始蕩平準部旋戡定回疆則爲傅澤布等五百十二人初年湖南苗亂爲李如松等十五人廣西土賊爲倪國正等十人瞻對土司之亂爲陳文華等十三人隨傳清拉布敦同死西藏爲策塔爾等六人金川用兵其初定也爲楊先春等百又四人其再定也爲占闢納等八百五人緬甸用兵爲馬成龍等百六十七人安南用兵爲英林等百六十人廓爾喀用兵爲索多爾凱等七十六人逆回蘇十三田五之亂爲新柱等百又十人山東王倫之亂有晉濟圖等十八人臺灣林爽文及陳周全之亂有耿世文等百五十九人黔楚等省苗亂及川楚陝三省教匪均始乾隆末年而定於嘉慶苗亂有六達色等二百七十八人教匪之亂爲楊治霖等七百四十二人狃苗滋事爲胡慶遠等百十三人閩粵洋面蔡牽之亂爲陳名魁等六十七人先後以巡洋遇

風死者爲黃勇等十七人滑縣李文成之亂爲強克捷等六十三人追剿陝匪及瞻對永北廳夷匪等役爲馬魁等十四人馬營壩搶險者盧順道光重定回疆一役爲劉發恒等二百六人江華搖滋事爲馬韜等五人陝甘番滋事爲胡文秀等十三人雲南永昌回匪滋事爲朱日恭等九人臺灣嘉義土匪爲方振聲等七人山西曹順之亂爲楊延亮等英吉利開釁爲朱貴等八十八人髮匪之亂熾於咸豐而殄於同治其先爲廣西會匪始道光季年爲王叔元等五十一人已而竄陷各省爲褚汝航等五百七十九人捻匪之亂爲龍汝元等七十八人咸豐同治之交滇匪滋事爲林廷禧等四十二人同治朝甘肅回匪滋事爲訥勒和春等三十七人其自嘉慶迄光緒先後勦辦各省匪徒等役爲和致等三十八人咸豐換約起釁殉淀園者爲覺羅貴倫玉潤等辦匪而以勞卒者爲李文安等十三人蓋原傳可數者如此中以不從尙之信叛而死之金光私家傳述心跡殊異則出以存疑將帥之死事者既有專傳凡上列諸人之義烈尤著者與夫官書旣漏而不能無紀載者則別編爲傳摘見本末若夫道光以

後死於外蠻及光緒庚子拳亂宣統辛亥革命於義宜詳並備列之用資後鑒云

忠義一

特音珠 阿巴泰

固山 僧額等

納密達 炳圖等

書寄阿 成濟等

穆護薩 覺羅圖等

索爾和諾 奎盛等

席爾泰 滿達理

卓納 納海

覺羅鄂博惠 覺羅阿贊等

同阿爾

董廷元 廷富 廷柏

常鼎 白志順等

格布庫 阿爾津等

濟三 順密色等

敦達里 安達里

許友信 成陞等

特音珠滿洲鑲藍旗人姓完顏清初偕阿巴泰來歸阿巴泰姓覺爾察屬滿洲正白旗太祖始編佐領以特音珠兼管六佐領事設札爾固齊十人阿巴泰預

焉乙未年特音珠從額駙揚古利征輝發部奪塔思哈橋掌議者中礮仆佐領
五岱代舉之蒲城爲飛石所中與額駙托柏佐領和羅俱歿於陣特音珠先登
克其多璧城己亥年從征哈達城上矢石如雨佐領耶陳奮勇登被戕特音珠
在事有功庚戌年阿巴泰從內大臣額亦都招撫東海窩集部之那木都祿綏
芬甯古塔巴瑪察四路降其長康古哩等復取雅蘭路阿巴泰力戰陣亡辛亥
年特音珠從揚古利攻呼爾哈路札庫塔城三等侍衛貝和佐領貴三松阿里
戰歿特音珠負創戰益力三等侍衛阿達海先登克其城阿達海額亦都第五
子也癸丑年烏拉貝勒布占泰負恩叛大兵討之布占泰率兵三萬由富哈城
而東特音珠阿達海率護衛業中額等邀擊之阿達海業中額及間散米拉渾
均歿於陣大兵敗布占泰遂平烏拉特音珠尋以創發卒征烏拉之役死事者
有阿蘭珠納蘭察均自有傳

固山滿洲正黃旗人姓哲爾德世居界凡初任佐領天聰三年征明固山偕驍
騎校僧錫閑散達蘭從揚古利爲前哨攻永平遵化達蘭先登圍明都固山步

戰大紅門上下高坡騰躍如飛明兵奪氣涿州援兵至敗之崇德元年復隨揚古利征明攻順義僧錫先登十二月太宗親征朝鮮豫親王多鐸等先驅圍其國都固山等從屢斬馘朝鮮國王李倬遁南漢追圍之太宗至臨津江冬煖冰泮多鐸令僧錫等潛測江水欲浮馬以濟僧錫等夜至大風冰復堅還報大軍安驅而渡抵南漢山城西二年正月全羅忠清兩道巡撫總兵來援多鐸與揚古利迎戰揚古利率僧錫冒霧馳擊援兵敗走復依山列陣矢石如雨僧錫與雲騎尉鄂海參領特穆爾佐領弼雅達阿紐都敏俱力戰歿於陣進逼山頂敵營敵兵乘馬遁達蘭率二十人乘夜用雲梯襲南漢山城先登中槍卒又命分兵攻江華島將渡江敵船百餘分兩翼以拒舟師從中衝入固山手發紅衣礮皆敗竄既登岸島槍手千人復列岸以拒固山力戰陣亡大兵繼進盡殲其岸兵遂克江華島李倬降朝鮮以定

納密達滿洲鎮白旗人姓索綽羅世居吉林天聰八年從大兵征明攻雄縣梯城首登崇德元年親征朝鮮明總兵沈世魁副總兵金日觀駐皮島爲朝鮮援

納密達偕閒散扈習從攻南漢城有功二年正月朝鮮降世魁等不能救先是明帥毛文龍據皮島欲牽制我師旣而文龍爲巡撫袁崇煥所殺世魁代領其衆失士卒心勢益弱猶乘間擾邊三月命武英郡王阿濟格貝子碩託率恭順王孔有德智順王尙可喜等攻皮島以納密達及護軍參領炳圖爲前隊佐領巴雅爾圖武爾格以大臣子弟從征巴雅爾圖額駙揚古利之從子武爾格宏毅公額亦都之孫內大臣圖爾格之子也師攻鐵山頭等侍衛拜音台柱佐領珠三先登克之世魁遁入石城四月阿濟格令納密達等乘小舟攻皮島西北隅日觀列兵堡上衝入將及岸巴雅爾圖武爾格躍登明人辟易納密達炳圖並登而後隊金玉和等不進日觀見師少復進戰武爾格陣亡納密達等往來衝突拜音台柱珠三及護軍校彭吉泰急棹小舟登岸援之明人空城出戰納密達巴雅爾圖炳圖拜音台柱珠三彭吉泰並戰歿有德等乘巨艦攻東北隅日觀殊死鬥有德等部將洪文魁等多戰死阿濟格麾八旗騎兵蹴之護軍參領瑚什雲騎尉果科暨扈習奮勇先入歿於陣大兵繼之陣斬日觀追擊世魁

戮之是役也敗明兵一萬七千有奇俘三千餘自是明不復守皮島

書寧阿滿洲正黃旗人姓札庫塔崇德三年八月命睿親王多爾袞統左翼貝勒岳託統右翼分道征明書寧阿以佐領偕騎都尉威濟泰參領恩敏屬右翼九月攻牆子嶺威濟泰力戰歿於陣師入靑山口攻豐順護軍校扈護巴雅拉攻靈壽開散噶普碩攻南皮騎都尉阿延圖攻深州開散巴林均戰歿岳託攻樂城明督師盧象昇來援書寧阿乘其未至麾衆薄其城護衛袁布躍登城樓火藥發焚死書寧阿復衝入克其城轉戰下慶都奮勇陷陣被戕十二月兩翼連營大戰鉅鹿之賈莊象昇戰死於是分徇山東四年正月左翼克濟南右翼分兵略地破荏平護軍三晉破臨清佐領花應春破館陶佐領佟桂破濟甯佐領祖大春破鄒縣佐領尙安福破滕縣騎都尉傅察俱歿於陣二月大軍還扈敏復攻破首陽及順德負重傷戰益力還至永平與佐領巴海烏納海俱遇伏死之騎都尉阿爾休隨大軍同徇山東克濟南復從承政索海征索倫陣亡護穆薩滿洲正黃旗人姓賴布世居佛阿拉崇德五年以武備院卿從大兵征

明距錦州城五里列陣以礮攻城北原馬臺克之七月睿親王多爾袞遣卒刈城西北禾稼明兵突出槍礮並施護穆薩與護軍參領覺羅蘭泰署護軍參領溫察力戰明兵大潰追至濠掩殺之克臺九及小凌河西岸臺二錦州外城蒙古貝勒諾木齊等見大兵困城志必得謀來降遂持書縋城下約內應信洩大兵至明總兵祖大壽出拒戰城內蒙古總緝前隊援之以登吹角夾攻護穆薩躍上被創卒覺羅蘭泰參領宏科俱陣歿鏖戰久明師退守內城大兵遂入外城明年五月明總督洪承疇率六總兵兵六萬來援屯松山北岡擊斬其二千敵勢猶勁騎都尉卞傑參領彰庫善三等侍衛博朔岱陷陣死八月大軍駐松山杏山間立營截大路承疇率馬步兵十三萬營松山城北亂峰岡旋犯汛地聞散輝蘭同參領囊古擊卻之參領阿福尼越衆衝突負重傷猶斬將奪幟諸軍繼之敵奔塔山遂進兵松山城外十二月承疇以兵六千夜至輝蘭舊殺既出復進擊與溫察啟心郎邁圖皆歿復沿濠射擊殺四百餘人敵退入松山城圍既合明總兵曹變蛟欲突圍出至正黃旗汛地佐領彰古力戰死變蛟亦中

創奔還七年二月克松山擒承曙及明巡撫邱民仰總兵王廷臣變蛟等時明總兵吳三桂猶駐塔山鄭親王濟爾哈朗率兵至城下列紅衣礮攻之佐領崔應泰被創死參領邁色力戰陣亡城壞二十餘丈諸軍悉登遂克塔山先是蒙古兵有降於明者特穆德格執而戮之及兩師酣戰復有訥木奇突出躍陣乘馬衝入多爾袞營將行刺特穆德格隻身奮救相抱持急卒遇害

索爾和諾滿洲鑲紅旗人姓科奇理世居瓦爾喀少孤兄瑚禮納撫之瑚禮納爲警所害嘗手刃警二人祭兄墓宗黨義之崇德三年來歸授佐領從征錦州松山皆有功七年十月命饒餘貝勒阿貝泰爲奉命大將軍征明索爾和諾率驍騎校佟鳴爾爲前隊次黃崖口阿巴泰使三等輕車都尉齊薩穆佐領綽克托護軍多羅岱圖爾鳴圖伏隘口舉火明兵驚潰遂入薊州敗明總兵白廣恩軍齊薩穆綽克托及佐領額貝參領五達納護軍校渾達善皆歿於陣分攻霸州多羅岱先登攻定州圖爾鳴圖先登俱克之並以傷重卒閏十月次河間明分守參議趙珽知府顏允紹城守旣進攻允紹發礮拒擊參領署都統陳

陣亡礮裂毀城堞護軍薩爾納冒火躍上明兵死門被戕允紹完堞拒守馳檄
四川請援阿巴泰連營圍之時明於山海關內外分設總督復設昌平保定二
總督又有寧遠永平順天密雲天津保定六巡撫寧遠山海中協西協昌平通
州天津保定八總兵皆擁兵壁旁縣嶺不敢近索爾和諾曰河間不下者恃外
援也破其一營皆瓦解矣阿巴泰從之遣將襲明總兵薛敵忠營敵忠遁諸援
師悉潰使人諭速降允紹等守益力急攻之索爾和諾梯登師繼進破其城珽
允紹並死索爾和諾亦戰歿十二月大兵徇山東諸州縣各設城守攻臨清開
散珽通格攻泗水護軍校務珠克圖攻新泰開散特庫股攻冠縣開散特穆慎
攻館陶開散東阿攻滕縣開散赫圖富義攻鄒縣開散貴穆臣攻費縣開散索
羅岱攻兗州佟噶爾及驍騎尉屯岱皆戰死諸州縣皆下乘勝至海州八年五
月旋師

席爾泰姓棟鄂父綸布清初率四百人來歸賜名普克素編佐領使席爾泰統
之有功授世職在十六大臣之列時明總兵毛文龍籠絡遼陽沿海居民踞皮

烏爲重鎮時窺邊界鎮江城中軍陳良策潛通文龍令別堡之民詐稱文龍兵至大謾城中驚擾良策乘亂城守席爾泰偕同族佐領格朗擊卻之後復偕格朗從攻瀋陽陣亡於渾河其妻營達禁屠馬祭夫例當死削世職原之時戰渾河者爲滿達理滿達理正黃旗人姓納蘭世居布顏舒護魯任佐領隨揚古利軍瀋陽明兵二萬渡渾河來援長矛大刀鎧冒重棉氣甚銳參領西佛先歿於陣滿達理繼進敗之明總兵李秉誠率三千人守奉集堡歿死者無算卒大創之遂克瀋陽滿達理以先登功最隨攻遼陽明經略袁應泰急注太子河於陸閉西關環城列守大兵軍其城東南秉誠暨總兵侯世祿以兵五萬背城五里而陣擊走世祿奪橋從小西門緣梯登城遂拔之旋歿於陣

卓納姓納喇氏滿州鑲藍旗人哈達貝勒萬之孫太祖時來歸授佐領賜姓覺羅天聰五年征明圍大凌河城明監軍道張春總兵吳襄宋綽等率馬步兵四萬自錦州來援副都統綽和諾冒敵矢力戰隕於陣備禦多以先戰歿卓納繼之時襄兵先敗逐北三十餘里張春復收潰衆立營風起黑雲見春大縱火風

順火熾卓納益銳進與管武備院事達穆布二等輕車都尉朱三佐領拜桑武騎都尉尼馬禪護軍校愛賽雲騎尉瓦爾喀均戰死天忽兩反風大軍乘之緯敗走生擒春信勇公費英東子納海亦於是役被創齒落其三復從舟師攻旅順明總兵黃龍禦甚力納海與參領岳樂順護軍校額德千總程國輔騎都尉塔納喀等奮勇登城冒矢石而殞遂克旅順口

覺羅鄂博惠興祖元孫隸鑲紅旗阿賚景祖曾孫隸鑲黃旗並爲佐領隨征有功天聰三年大兵証明並從貝勒岳託克大安口抵遵化明巡撫王元雅嬰城守命分旗環攻之鑲紅旗西之東鑲黃旗西之南各分領前隊與正藍正黃正白各旗兵並進城上矢石如雨乘護軍校阿海躍登急攻之克其城大貝勒代善率護軍及火器營至薊衝明山海關援兵阿賚死之趨永平沙庫山鄂博惠中創歿雍貴隸正白旗崇德三年從睿親王多爾袞征明下山東四年師旋敗通州河岸兵五年從圍錦州敗松山兵破杏山援兵皆有功七年復圍錦州同覺羅薩哈連等直前衝陣大敗其衆明總督洪承疇以十三萬衆來援薩哈連

戰歿雍貴同護軍統領伊爾德連敗之乘兩偏松山擊走其馬軍復率本旗兵
攻塔山明總兵曹變蛟夜犯鎮黃旗汛地復隨伊爾德擊走之八年九月隨鄭
親王濟爾哈朗征甯遠抵中後所借護軍參領額爾碧衝入敵陣拔其城十月
進攻前屯衛以第五人登中礮歿大兵繼進遂克之登西克隸鎮黃旗官散秩
大臣順治二年隨楊威大將軍豫親王多鐸追流賊李自成至西安激戰於天
沙山中槍陣亡阿克善景祖兄索長阿三世孫隸正黃旗隨大兵征明於錦州
甯遠及入關擊李自成皆有功歷官至兵部侍郎順治九年同都統噶達渾征
勦鄂爾多斯部叛逃蒙古多爾濟等殲之賀蘭山以失究興安總兵任珍家屬
淫亂擅殺多人事解兵部管副都統事十一年隨征湖廣敗賊兵於湘潭常德
龍陽等處十三年鄭親王世子濟度征海賊鄭成功阿克善率兵從大軍至烏
龍江以水險難渡乃潛取道山間徑趨福州未至聞成功在高齊即分兵令佐
領褚庫等先往迎戰擊走之又分遣署護軍統領伊色克圖往侯官征勦水路
賊遂抵福州又偵知賊船三百餘尙泊烏龍江親督水路約營總星鼎等在陸

路合擊追至三江口斬僞都督總兵等俘獲甚衆以賊犯羅源駐防兵被圍率兵赴援力戰陣亡薩克素隸鎮藍旗康熙十三年以佐領從平南大將軍賚塔征耿精忠賚塔駐衢州遣防台州黃巖縣賊將曾養性率衆六萬來犯堅守攻不能下參將武顯通賊獻城薩克素力戰死之星德隸鎮紅旗亦以耿精忠叛從江甯將軍額楚討之於江西建昌敗賊帥邵連登八萬餘衆在事有功後於十六年攻吉安與賊將馬寶戰於陳岡山陣歿果和里隸鎮黃旗以委署參領隨平遠定寇大將軍安親王岳樂征吳三桂戰於湖廣瀏陽陣歿努赫勒隸鎮黃旗以一等侍衛從征三桂十七年六月三桂遣其黨江義巴養元杜輝等率二萬餘賊駕巨艦二百餘乘風犯柳林噴努赫勒隨討逆將軍鄂訥率水師棹輕舟飛越賊艦發礮擊之溺死無算賊退犯君山又以舟師進擊追至湘陰十九年隨固山貝子彰泰復遵義安順石阡思南等府追勦至鐵索橋僞總統高起隆夏國相等擁衆二萬餘屯平遠與江西坡賊相犄角大兵分道進勦努赫勒從擊平遠西南山賊力戰陣歿海蘭隸正白旗由侍衛擢副都統雍正七年

授參贊大臣從靖邊大將軍公傅爾丹征準噶爾九年六月分三隊渡科卜多河與蒙古副都統常祿皆列後隊初戰庫列圖嶺旋移營和通呼爾哈諾爾海蘭與常祿據山梁之東殺賊千餘適大風雨雹師被圍常祿陣亡海蘭突圍出殺賊五百餘卒以察哈爾兵潰海蘭死之

同阿爾蒙古鑲紅旗人世居巴林以地爲氏授驍騎尉崇德三年多羅貝勒岳託征明同阿爾與焉當師之出邊也副都統席喇命率護軍防守七晝夜敗敵者再六年五月隨睿親王多爾袞圍錦州明總督洪承疇率重兵來援以步兵三營犯左翼三旗護軍不能勝奔濠塹同阿爾偕同族同族僧格及蒙古鑲紅旗人阿桑布嚴守汛地奮勇戰死蒙古正紅旗拜澤岱正黃旗阿布喇庫鑲黃旗布齋均先後歿於陣

董廷元正白旗漢軍與弟廷儒廷柏並以閒散從征天命六年兵攻瀋陽廷元先登陷陣授寬甸守備從攻大凌河察哈爾旅順口江華島皆有功崇德二年從恭順王孔有德征皮島明總兵沈世魁陣海口廷元以小舟從北衝入明兵

礮碎之與家丁六人歿於海廷儒積功爲大同守備順治五年大同總兵姜瓖謀叛以廷儒勇略過人爲士卒愛憚倖以宴射誘至署諷以同叛廷儒以嚴詞斥之不聽即拔佩刀與門賊羣執之罵不絕口剖其腹支解之併其子開國男婦二十七人俱被害廷柏初任驍騎尉崇德五年從征明同參領孫有光敗松山步兵杏山騎兵閻洪山守兵明兵夜犯填塹手發紅衣礮擊卻隨攻塔山及前屯衛中後所等城均以紅衣礮克之績稱最順治二年從豫親王多鐸南征破流賊定河南克揚州嘉興等處俱在事有功時明魯王朱以海據紹興大兵營錢塘江上明督師大學士張國維以兵九千人乘夜劫營廷柏從都統吳守進敗之後從鄭親王濟爾哈朗征湖廣明總督何騰蛟招流賊連營拒敵從副都統金維城率兵至馬河力戰歿於陣

常鼎鑲紅旗漢軍順治元年以副將隨懷慶總兵金玉和討流寇李自成之西竄也英親王阿濟格由邊外趨延綏斷其歸路至望都佐領劉圖被創卒入陝至延安府虛銜章京哈爾漢率甲士守南山力戰死侍衛察瑪海騎都尉嘉龍

阿參領折爾特護軍校朔瑪俱以陣亡餘黨二萬餘散在河南圍濟源攻孟縣蔓延鄧州內鄉縣及清化鎮鼎隨王和援濟源至則城已陷戕典史李應選鼎夜半遇賊力戰與王和俱陣歿王和自有傳時懷慶鎮標同死者守備則白忠順余國諫陳應傑石斗耀康虎千總則宋國俊趙國相李中王國臣楊虎劉奉相高友才把總則張進仁張光裕陳廷機張景泰許養和党中直廖得仁薛貴等賊旋圍孟縣知縣王曰俞參將陳國才嬰城守賊攻七晝夜不能下將引去會大雨城壞賊入曰俞國才率兵巷戰國才被戕執曰俞脅降不屈死賊又圍鄧州道標中軍鄭國泰戰死大兵救鄧州賊解圍去轉攻內鄉縣執知縣胡養素索金帛不應死之賊分兵犯清化鎮署同知史燦麟莅任甫兩月執法嚴奸民憾之引賊入執燦麟怒罵不屈賊忿磔其屍妻高氏及婢僕同殉嗣後土賊剽亂者二年有輝縣寇據北山大伍谷諸險列三十一寨官兵仰攻賊以死據不克登久之乞降官兵防其他逸也把總田貴羅思明守寨口賊乘夜斫寨門遁貴與思明倉卒出門皆遇害五年寇起武陟之甯郭驛驛接太行山爲盜藪

舊設捕盜通判駐其地賊僞稱獵者馳入驛西郭門騎百餘披甲持刀仗焚劫入通判張可舉署可舉力門遇害十四年睢州賊婁三嘯聚沙窩乘夜登鄆城縣城開北門引衆入知縣荆其惇督家丁衆役守庫印力禦之受刃傷會典史樊世亨率牌甲奔救賊乃遁其惇創重死庫印卒無失

格布庫滿洲正白旗人姓伊爾根覺羅世居雅爾虎順治元年以參領從睿親王多爾袞勦流賊李自成追至慶都復隨英親王阿濟格貝勒尼堪敗之三年肅親王豪格征流賊張獻忠於蜀格布庫及參領西特庫隊長古朗阿巴揚阿烏巴什隨焉獻忠遣賊黨環營抵抗格布庫破賊第一營步兵賊分兩翼豪格復遣偕佐領蘇拜攻右翼都統準塔巴圖魯攻左翼賊自右翼下山來犯格布庫率本旗兵衝擊之旋從準塔剿其左翼賊圍正藍旗兵格布庫偕佐領阿爾津噶達渾西特庫烏巴什往援格布庫中箭殞西特庫烏巴什俱歿於陣賊退時僞將高汝勵據三寨山豪格遣古朗阿擊之大破其衆獻忠發大隊迎敵古朗阿直衝其陣賊奔潰未幾復合古朗阿偕瑚里布破之賊率馬步兵分三路

來犯古朗阿奮勇進擊與巴揚阿均陣亡

濟三滿洲正黃旗人姓扎庫塔自崇德六年以佐領從大兵有功順治元年與騎都尉色勒布雲騎尉祖應元參領金應得驍騎尉西來間敵達魯哈薩門岱納並從定國大將軍豫親王多鐸南征二年四月大兵渡淮薄揚州城應元應得岱納以紅衣礮攻城城頽岱納先登與應元應得同陣亡克揚州大兵渡江令左翼舟師留泊北岸備敵敵駕舟來犯色勒布迎擊中礮死分兵江陰縣薩門以雲梯先登被戕達魯哈繼進亦陣歿六月多鐸定南京分大兵之半令多羅貝勒博洛等進徇蘇州下之擢濟三副都統駐守明福王總兵黃蜚潛納蘇州叛卒來襲濟三聞變率兵擒勦敵合圍濟三戰死大兵至浙攻嘉興礮毀其城西來率所部先登克之旋回兵取崑山縣城被礮死期密色滿洲鑲黃旗人姓佟加世居加哈崇德元年以佐領銜從征明屢有功順治元年從入關敗流賊唐通於一片石追至安肅望都殲賊無算嗣隨多鐸軍渡江屢破明兵句容時明魯王朱以海踞紹興博洛遣參領王先爵徇湖州土兵蜂至元爵戰歿博

洛次杭州魯王遣其督師侍郎孫嘉績熊汝霖渡錢塘江來犯瑚密色偕騎都尉色赫等擊敗嘉績兵擒其隊帥追至江中汝霖兵殊死戰瑚密色中槍戰死色赫從定浙江旋下福建還過平湖遇土寇亦以中槍陣亡

敦達里滿洲人幼事太宗後分隸肅親王豪格崇德八年八月庚午太宗崩敦達里以幼蒙恩養不忍永離遂以身殉諸王貝勒等義之以敦達里志不忘君忠忱足尙贈甲喇章京子孫永免徭役安達里葉赫人來歸時太宗憐而養之洊授官職亦請殉諸王貝勒等亦甚義之予衣一襲像議卹典加贈牛录章京爲梅勒章京子孫世襲如敦達里例既定議召安達里諭之臨殉時謂諸王貝勒等曰若先帝在天之靈問及後事將何以應諸王貝勒等對曰先帝肇興鴻業我等翊戴幼主嗣位承基當實心輔理儻邀呵護是所願也

許友信以軍弁隨明將左夢庚投誠隸鎮白旗漢軍隨大兵征閩粵有功定南大將軍貝勒博洛委署潮州副總兵順治四年明桂王由榔遣兵略境友信單騎出戰遇伏死是年桂王兵部尙書張家玉陷東莞署總兵成陞副將李義均

陣亡桂王兵科給事中陳邦彥同時犯廣州游擊閻行龍王士選熊師文俱死之桂王既由監國僭號志在興復其始略有兩廣雲貴湖南江西四川各地且鄭成功出沒閩浙奉其偽號遙相應和聲勢頗張經大軍先後戡定桂王已窮竄土司肅清在邇而孫可望李定國等復羣相擁戴作螳臂之拒者有年至定國與可望內訌順治十四年十月可望走湖南乞降於是洪承疇吳三桂乃奏請乘時大舉逐漸進剿軍行有利十八年三桂兵及緬甸緬人執獻由榔軍前事乃大定十餘年中死事或被執不屈者如四年勦廣東假明封號土賊有廣東巡按劉顯名等六年勦靈山土賊有廣東都司僉書李昌等七年征廣州有輕車都尉尙可福等八年李定國分兵窺全州有廣西巡按王荃可等九年犯辰州有分巡辰常道劉昇祚等犯平樂有府江道周永緒等犯柳州有分守右江道金漢蕙等陷桂林有右翼總兵曹成祖提標游擊馬騰龍等十年犯羅定有兵備道鄧象鼎等犯靖州有湖南副總兵楊國勳等犯連州有廣東運署都司僉書竇明運等犯化州有防守參將應太極等十一年犯電白有從征八品

官費揚古等十四年海賊乘亂竄雷州有徐聞營游擊傅進忠等孫可望之從亂也六年賊黨一隻虎犯永州有新擢陝西布政使右參議李懋祖等九年犯衡州有隨定遠大將軍敬謹親王尼堪部下副都統武京等犯成都有叙州府知府周基昌等十三年犯臨藍有委署參將殷壯猷等至爲鄭成功而死者三年成功族人鄭彩據廈門掠連江有知縣宋人望等六年成功犯長泰有知縣傅永吉等犯漳浦有總兵楊佐等八年犯海澄有知縣甘體垣等十二年犯仙游有知縣陳有虞等十三年犯海澄有一等輕車都尉哈勒巴等犯福州有二等輕車都尉巴都等十五年犯台州有海門營水師游擊李宏德等犯溫州有盤石衛水師游擊熊應鳳等十七年犯江甯有一等輕車都尉瑚仲布祿二等輕車都尉猛格圖等犯崇明有知縣陳慎等犯台州之太平有左營都司李柱國等犯廈門有護軍統領伊勒圖前鋒參將佟濟前鋒校鄂勒布等蓋明藩自立以兵力削除者桂王爲最棘同時附唐王朱聿鍵而陸梁於江西郡邑者則爲金聲桓參領布達理布政使遲變龍分守湖東道成大業宜黃知縣馮穆等

皆死之魯王以監國踞浙徧福建興化則知府黎樹聲等據舟山內擾則紹興府推官劉方至死之其無所附麗而以叛聞者爲姜瓖五年踞大同催餉騎都尉鍾固山西兵備道宋子玉等死之六年從英親王阿濟格等軍進討者騎都尉索甯雲騎尉洛多理等皆陣亡分援河東井陘蒲州神木等處則鄭宏國修國仕武船鄭世英等亦先後陣亡時天下初定人心反側各省土賊繼起或勦或守在順治一朝死者尤夥獨著其關係大局者見有清開國艱難之大概焉

清史稿

列傳

忠義二

朱國治

楊應鸞

馬江鎮總兵

周俗生

楊三知

孫世譽 孫世琬

劉嘉猷

高天爵

李成功

嵇永仁

王龍光等

葉有挺

戴瓊

劉欽鄰

柯永昇

陳光啓等

道禪

李茂吉

劉琨

羅鳴序

馬寶倫 劉鎮賢

朱國治漢軍正黃旗人順治四年由貢生授固安知縣屢擢至大理寺卿十六年外簡江寧巡撫時鄭成功盤踞外洋出沒江南濱海州縣國治疏言欲破狡謀先度形勢賊衆負險我師遠涉風濤其勞逸不同賊衆熟識海道我師弓馬

便捷其素習不同水師舟楫較之賊船大小懸殊其攻取不同臣謂宜以守寓戰凡海邊江口多設墩臺待賊勢困援絕乘間攻之自能禽渠獻馘下所司議行又以蘇松常鎮四府錢糧抗欠者多分別造冊紳士一萬三千五百餘人衙役二百四十人請敕部察議部議見任官降二級調用矜士褫革衙役照贓治罪有差以是頗有刻覈名康熙十年補雲南巡撫時吳三桂謀叛久矣十二年詭請移藩錦州并期以十一月二十四日啓行國治方請增設驛堡協撥夫馬待之三桂遽踞關隘起事先期三日邀國治及按察使李興元雲南知府高顯辰同知劉崑竹之從逆皆不屈國治罵賊尤烈即時遇害先後殉難者雲貴總督甘文焄先後廣西巡撫馬雄鎮傅宏烈及李興元均自有傳

楊應鶚鑲黃旗漢軍任貴州貴陽府同知三桂初叛執應鶚送雲南錮之順寧應鶚密謀舉義僞將軍趙永寧縊死之時有馬宏儒者順治十八年武進士三桂素重之迫共叛不聽以鐵椎椎其齒齒盡落囚昆明不屈死先後在滇殉節者爲鄒相等相江寧人以中書隨軍至雲南大兵入滇檄權石屏州事有惠政

僞總兵高應鳳作亂相死之昆明人楊樹烈以四川南川縣知縣告休家居寇至北面再拜自縊死土酋龍船等分道剽掠寧州知州曹誠嬰城守城陷死之原任曲靖府教授周起元則以被執不屈死生員有唐方齡張鵬羽三桂既叛所在蠢應死貴州者陳上年直隸清苑人順治六年進士時官分巡右江參議道三桂既執巡撫傅宏烈乃脅上年降幽繫死都勻縣防兵謀應賊譚譚焚掠知縣薛佩玉諭以順逆衆不聽偏受僞職佩玉北面再拜自縊死死湖廣者祝昌河南固始人順治六年進士由中書累擢至辰沅道三桂叛聞即流涕諭衆大義皆感泣賊大至城潰北面再拜自縊死生員有李廷垣張一元徐翹楚死江西者爲饒州府知府郭萬國萬年縣知縣王萬鑑萬國河南許州人由諸生從經略洪承疇官貴州撫苗蠻有功萬鑑浙江錢塘人由貢生官福建平土賊有功賊黨圍廣信急覘饒州備虛由間道薄城萬國令萬鑑赴省請援甫出北門賊猝至與家僮六人中礮歿饒州營參將趙登舉聞警馳救衝賊營禽前隊數人伏起陣亡賊黨環城招降萬國集其屬同知范之英鄱陽縣知縣陸之蕃

石門巡檢翁鳳翥饒州稅課大使李崇道謂之曰文臣不習戰然守土吏當死不可徒手就戮皆應之賊偏靈芝門擊堞登萬國率家丁巷戰身先之中十六創與之蕃鳳翥崇道俱戰歿文英亦被執不屈死萍鄉民人彭程淑亦以三桂餘黨擾其鄉裂眦怒罵被亂刃死死廣東者金世爵鎮藍旗漢軍由舉人任合浦縣知縣高州總兵祖澤清叛附三桂世爵圖城守僞將王宏勛率賊數萬犯旅州世爵登陴力禦城陷與守備杜嶠同死之又侯進學者隸平南王尙可喜藩下先爲三桂所脅爲遞逆書至廣州自首可喜以聞嘉之授世職至是爲賊所得囚木籠送常德三桂櫛之於市逆黨馬雄攻新會藩下諸將多附逆誘左翼游擊文天壽同降天壽叱之曰背主不忠吾錚錚丈夫豈鼠輩可脅遂被害沈屍海中死川陝者波羅營副將張國彥聞提督王輔臣叛城守兵變逼獻印自刎死漢中城陷同知汪化澄不受僞職賊繫之復給僞劄令攝縣事化澄痛哭望闕遙拜自縊死漢鳳參將蘇興亦叛附三桂將襲殺副賊筆帖布格爾以滅口千總魯仁圻憤甚度無以制之朝衣拜父像告訣叩臂力爭觸輿怒殺之

仁圻畜一犬護屍不去故吏梁玉收而葬之又廣安州知州徐盛劍州知州向榮商南縣知縣盧英渠縣知縣王質綦江縣知縣王無荒營山縣知縣廖世正及典史劉廷臣西安府知事張文選司獄周勝驥白水縣典史趙煥文並以被脅不屈死其以招諭死者三桂未叛時主事辛柱筆帖式薩爾圖隨侍郎哲爾肯賞詔至滇既叛辛柱薩爾圖將詣闕告變賊殺之後則漢川巡檢章啓周浙江會稽人從順承郡王額爾錦軍以劄委通判往招諭三桂被戕及吳世璠時又遣四品銜董重民往諭以順逆至鎮遠逆黨以弓絃縊殺之又揚威大將軍簡親王喇布檄益陽縣知縣徐碭往衡州招撫三桂餘黨至泉溪渡爲僞將軍吳國貴所殺邵陽降調通判許文耀阿迷州吏目郭維賢亦均以招撫三桂餘黨遇害郎中祝表正隨經略大學士莫洛討叛鎮王輔臣莫洛戰歿輔臣幽表正於營尋復具疏附表正還奏聖祖卽遣表正諭輔臣至則百方曉譬留弗遣卒爲僞總兵巴三綱所殺甘肅靜甯州知州王札亦以單騎諭輔臣禍福被脅不屈死又撫叛鎮王屏藩死者爲四川鎮標副將徐升耀劄付通判王官表沈

日章割付參將吳子騷等

周岱生字青嶽江西德化人由拔貢生除貴州餘慶縣知縣改廣西平南縣知縣康熙十三年吳三桂叛六月其黨破梧州攻平南岱生練鄉團狼兵拒之大峽口鏖戰三日斬其魁七月復大至岱生奮身拒戰攻益急鄉團皆戰死退保城固固援絕自寅戰至午城陷賊繫岱生往潯州脅降罵不絕口妻楊氏於路先自剄死旋又甘言誘岱生降卒遇害長子儒且哭且罵死尤慘岱生令餘慶時有老賊陳四者盤踞大同山垂三十年勦捕不能得出奇計招之親至其巢曉譬利害曰王師且至吾生汝賊咸泣誓終其身無反岱生曰盍隨我至縣城乎賊諾之於是至縣署賜之食厚爲之裝而遣之其後吳逆之變他縣賊皆響應惟陳四不受僞職平南市荒民少岱生捐俸招集始至城內草屋九間未幾商民大集俗竄不產蔬菜岱生教以播種灌溉之方畦畝鱗次相屬田皆老荒弗闢又招粵東流民後先千餘家報墾升科其他善政尤多

楊三知字知斯直隸良鄉人順治三年進士授山西榆次縣知縣榆次經流賊

殘破後井里蕭條三知以恩義安輯戶口日增康熙五年大同鎮總兵姜瓖叛連陷州縣攻榆次三知厲吏民募鄉勇守城夜遣人斫賊營間有斬獲賊不退三知令偃旗鼓示弱賊徑薄城攀堞欲登三知急起麾衆發矢石斃甚衆賊憤益兵圍之相持踰六月敬謹親王尼堪分兵來援賊始敗走三知設保甲練屯衆復捐俸立社學置膳田以資膏火士民感之擢兵部主事累遷郎中外擢四川松龍道上東道上東道屬經張獻忠慘戮存者在絕嗣密簪中招徠千數百家築堡渝東民名之曰楊公堡十一年補陝西神木道十三年入覲還至保德聞提督王輔臣叛附吳三桂從者勸遲行勿渡河不聽疾馳還署圍城守義三桂勦闖賊殘孽過神木市恩民鑒德之立生祠三知即毀之察知縣孫世譽忠實可倚時輔臣播僞劄將弁多爲所誘分據城堡惟韓城知縣翟世琪與神木通聲援世譽隸鎮紅旗世琪山東益都人順治十六年進士關中并稱賢令者也叛黨朱龍犯神木民汹懼三知適受檄赴京師代賀有諷可携眷行者謝之赴闕事竣抵署三日延安吳堡相繼陷賊至乘城死守親挽强弩發無不中柳

溝營游擊李師膺受僞劄鼓衆謀餉世琪出諭賊先被戕及其二子神木守將
孫崇雅亦通賊城遂陷崇雅合賊將環說三知以延綏開府啗之不應脅交敕
印不與賊迭以甘言誘三知且擁回署三知過井厲聲諭家人勿作兒女態躍
而入賊遽縋出之臂已折力以三知在官廉平初未相迫母自苦爲詞三知大
罵不絕口乃舁置別室環守之載脅載誘一夕忽合扉不知何以賊之其妻妾
及二女俱赴井以殉城復後家人始於淺土中獲三知遺骸經長夏面色如生
世譽亦抗節不屈賊羈之深室輔臣後降卒害世譽以滅口

劉嘉猷字憲明江西金溪人由明舉人順治初署興國新建教諭以正誼明道
爲教士多化之秩滿改福建侯官縣知縣爲閩浙總督范承謨所賞撤藩命下
嘉猷度平南王耿精忠必應吳三桂叛謂家人以旣宰茲土義不汙賊康熙十
三年三月精忠給文武赴藩府計事嘉猷從承謨後見鋒刃交戟脅承謨降不
屈縛以去嘉猷歷階而上厲聲叱精忠福州府知府王之儀建甯府同知喻三
畏同發憤罵賊精忠喝武士殺三人衆股慄嘉猷戟手作搏擊勢芒刃亟下與

之儀三畏同時被害城守千總廖有功見逆殺三人發憤大呼亦死之

高天爵字君寵漢軍鎮白旗人後改隸鎮黃旗由廕生於順治四年任山東高苑縣知縣累官至江西建昌府知府先是廣昌山賊踞羊石滴水二砦爲巢穴官軍仰攻輒爲滾木礮石所傷罷攻招降賊伴就撫仍伺隙煽亂官軍斃之獄餘賊益負固適風雨交作漂流樹木衝斷橋梁賊保巢不出天爵會巡道參將出不意直搗之禽斬盡毀其巢耿精忠據閩叛縱黨入江西犯建昌時天爵已擢兩淮鹽運使或勸之速行天爵以守此土十六年雖受代不可遽離答之率家丁數十人禦賊萬年橋城守副將趙印已降賊乘天爵力戰從後縛之獻賊載送入閩再四誘降不屈囚之越歲餘與副將王進武舉胡守謙把總楊起鵬姜山等同謀遣千總徐得功出仙霞嶺迎大軍入關陰結死士爲內應賊黨偵而計之十五年九月四日遇害後以福建巡撫下永譽請以天爵與原任福甯總兵吳萬福福州府知府王之儀邵武府知府張瑞午建甯府同知喻三畏邵武府同知高舉侯官縣知縣劉嘉猷尤溪縣知縣李垣福州城守千總廖有功

等合建一祠於省城西門外復以子其佩請扁書蕤忱義烈四字以額其家祠
長子其位自有傳

李成功奉天鐵嶺人順治六年武進士歷官至廣東潮州參將康熙十三年總
兵劉進忠應耿精忠叛成功潛與游擊張善繼等謀誅進忠事覺進忠以兵脅
同叛曰汝爲我中軍我視汝猶子何無義至此成功曰祿山叛國死於猪兒李
泚叛國死於韓旻汝今叛國不知死之將至我何爲從汝進忠命斬之罵不絕
口而死善繼直隸彭城衛人習儒通孫吳兵法康熙六年第二名武進士授潮
州城守營游擊進忠陰遣腹弁赴精忠獻欵弁歸與進忠謀曰善繼剛方固執
深得衆心宜亟散其卒進忠遂令所部分隸私黨善繼麾下虛無人謁進忠曰
公不聞晉王敦乎威勢未嘗不赫也兵敗身死發瘞斬屍未有叛國而克全終
者進忠怒羈之馬王廟貢生林應璧同被羈日談古忠孝事進忠屢遣人諭降
終不屈令斬之白虎陝西秦州人康熙十一年官澄海協右營都司有虎將名
進忠將叛調虎與其子崇質入郡至則知進忠有異志潛爲涕下進忠令虎易

帽虎曰頭可斷帽不可易令剪辮虎曰頸可截辮不可剪且責進忠詞甚厲左右以搖惑軍心慙進忠斃之進忠愛其勇不忍曰此愚人不識時務耳遂羈之篡取虎妻張虎孫士俊爲質虎與同志密遣人赴省請兵約內應謀泄將就刃謂崇質曰死吾分也委身存祀則在汝崇質對曰父爲忠臣子從叛賊烏乎可縛至西市虎望北叩首大言曰君臣大義盡於此父子至情亦盡於此矣觀者皆泣下何亮潮州人官澄海協千總虎以心腹待之亮隨虎赴郡進忠羈虎旋以內應事泄并將斬亮進忠叱之亮謂當訴於天同時遇害其兄弟妻子被殺者尤衆于國璉奉天人爲續順公沈瑞旗員進忠亂作瑞命偕都統宋文科鄧光明攻之戰太平街三日國璉身先士卒射傷進忠左臂賊披靡以衆寡不敵終爲所敗瑞縛光明及國璉以降國璉獨不屈斬於市屍僵立不仆數日而如生衆咸異之

嵇永仁字留山江南無錫人用長洲籍入學爲諸生入閩浙總督范承謨幕耿精忠應吳三桂叛執承謨脅永仁與同幕王龍光沈天成及承謨族弟承譜降

不從被執永仁少好從士大夫游討論國家典故六曹章奏條分件繫著有集政備攷一書以范嵇世交故相從至閩時精忠蓄謀未發屢陳弭變策如請撥協餉補綠旗兵安插逃弁條議屯田諸端冀固民心殺賊勢又請借巡視沿海爲名提輕兵駐上游制賊以文武吏皆預中賊餌號令格不行在獄凡三年賊害承謨乃痛哭自經死永仁知醫著有東田醫補工詩詞有竹林集葭林堂詩獄中又著詩二卷文一卷與龍光相倡和者又有百苦吟龍光字幼譽浙江會稽人諸生屢躋鄉闈年五十餘已倦游承謨撫浙延課其子擢閩督龍光以父老不欲行父以承謨有德於浙義不可辭遂往旣被執脅草安民檄誘以官爵皆不從與永仁誼最合嘗語龍光曰死之日魂魄願無相離在獄著養花說及雜詩五十餘首以見志天成字上章江南華亭人變作時與永仁約同死偶外出俄傳同難諸子死訊遂出踐宿諾爲逆黨縛獻時鞫者方窮究章奏將歸罪永仁天成厲聲辨曰承謨心事青天白日承謨無他志書生更何與焉乃同繫獄著詩一卷曰聽鵲又養花譜一卷以自遣三人在獄有書名和淚譜者龍光

爲永仁撰一首永仁爲龍光天成撰各一首詩詞皆燒桴煤畫牆上賴義士林可棟者或云泰寧人許鼎時往獄中探視默識之得以傳世承謨初被難部曲有張福建者手雙刀大呼奪門衛承謨羣攢刃死之精忠令三十二人監守承謨中有蒙古人嘛尼欲免承謨事泄被磔

葉有挺字貞夫福建壽寧人康熙九年進士甫釋褐即徒步南歸耿精忠以閩叛檄郡邑凡在籍搢紳悉坐名勒限起送有挺恥之潛入江西界佯言已死逾年以念母潛返僞縣令偵知之持檄促赴召有挺告母曰兒得進士思有以報君父今以進士被僞檄是得一進士反爲從逆之資兒死不赴如母何母以大義勉之乃抱母大號遁匿山寺僧知其爲葉進士也微拒之有挺仰天歎曰有挺豈以儒者七尺軀苟延旦夕爲釋氏恐怖又豈以身死蕭寺貽主僧禍夜起北向九叩南望母再叩出走山下自經古木死亂平無以上聞者故褒贈皆不及同時閩中殉難者蕭震侯官人順治九年進士任山西道監察御史丁父艱回籍精忠叛謀討之事泄遇害張松齡莆田人順治十二年進士由庶吉士屢

遷四川參議時川省彫敝松齡加意撫綏流亡漸復裁缺歸里耿逆迫以爲僞職羈數月終不屈死施大晃福清人康熙十二年進士聞變匿金芝山募壯士助大兵進討賊執之嚼舌罵賊嘔血數升死莆田舉人劉渭龍建甯舉人謝邦協南平舉人原任丹徒令鄒儀周皆不受僞職渭龍匿深山絕粒死邦協舉家避村落中逆黨以火攻之不出閨門遇害儀周爲所執不屈死光澤縣民毛錦生素有胆力賊躡其村邑當事飭爲練總導大兵進勦遇伏死雲際關清流縣諸生李亭隨邑令守城并集鄉勇拒戰旋被執督賊死又有張存者順昌人精忠亂作存糾義旅保元坑鄉脅授總兵劄令率衆出江西分大軍兵勢存不從時和碩安親王岳樂駐師南昌存潛使赴軍前乞援並條上攻賊機宜岳樂授存總兵劄令捍禦建昌邵武汀州等地且爲內應賊偵知之急攻元坑地平無險可扼存以忠義激衆屢敗賊賊恚甚分三路夾攻卒以不支被執死之戴璣字利衡福建長泰人順治六年進士授主事例轉湖廣按察司僉事時滇黔未入版圖上江防道尤要璣徧履所部自岳州至嘉魚立七汛造哨船巡邏

往符無警又於洞庭湖接立三汛行者尤便之洪承疇正經略五省以韓范儔稱之尋遷陝西西甯道未行丁父艱服除補廣西右江道駐柳州東蘭土酋構禍日久璣以恩意調解之大酋黃應元煽亂則斬渠魁以徇諸蠻川是懷德畏威頑梗盡化柳堡屯田寄佃於民既輸軍租復應民役爲申請督撫具奏獲免復修葺文廟及羅池司戶二賢祠會朝命裁併監司解任歸里督課諸子教以忠孝大義耿精忠亂作臺灣賊圍漳州時璣次子鑄爲海澄公將守東門賊劫至城下使招鑄降璣大聲呼鑄堅守勿以老人爲念賊怒牽去城破鑄巷戰死闔門爲俘大兵復漳州賊遁璣與子鏞等乘間入山而妻葉併諸幼子爲賊執赴臺灣璣置不爲意賊復犯海澄及長泰璣再被執脅之降不從幽之密室歷年餘終不爲屈朝夕誦文信公正氣歌以自壯一日顧謂子銑曰吾久辱不死何爲遂絕粒數日病甚衣冠命銑扶掖北向再拜曰臣死命也當爲厲鬼殺賊索紙筆大書惟忠惟孝可以服人數字嘔血數升死年七十有四

劉欽鄰江南儀徵人順治十八年進士康熙八年授廣西富川縣知縣十三年

廣西將軍孫延齡叛應吳三桂遣僞將陷平樂府旋圍富川欽鄰募鄉勇城守與賊相拒五十餘日同城把總楊虎受延齡僞劄句土賊千餘助攻虎夜引賊入欽鄰率家丁力戰殺賊三十餘家丁死者七欽鄰被執賊加以毒刑縛送桂林延齡誘降不屈羈之欽鄰賦絕命詞死追諡忠節崔成嵐鎮藍旗漢軍由官學生任鬱林州州判署藤縣知縣十四年孫延齡黨吳鳳等率賊數千犯藤縣水陸夾攻成嵐與守備劉志高汪雲龍典史黃新德守禦賊暫退已而復合延齡軍數千攻城西南抵禦益力巡撫洪陳明復遣援兵協力勦殺賊不退僞將軍緄成德復率賊萬餘由賀縣來勢益熾成嵐等相持七晝夜城陷成嵐手刃二賊歿於陣志高等均死之新德廣東海陽人讀書不多好遣文人皆笑之事亟時命其子曰禱扶母歸養既被執賊欲授以僞官新德曰王彥章且不肯降唐況天朝臣子從賊乎賊欲屠城新德曰倡守城者官也殺尉足矣於百姓何與賊怒斫之新德罵不絕口刀斧交下碎其屍家人四婢一皆死焉徵官死事世尤重之

柯永昇漢軍鑲紅旗人由員外郎出任湖南糧道累擢至湖廣巡撫康熙二十七年飭裁湖廣總督令標兵分別存撤五月裁兵夏逢龍同夥呼爲夏包子者結衆作亂二十二日突入巡撫署拒者輒刃之傷永昇臂奪其印復傷永昇足仆地悉竊其親屬家人出走搜掠財物永昇乘間自縊死賊四出剽略永州錦田衛守備隨光啟嬰城守力竭死之武昌永定營中軍守備孟泰慶戰金口亦中礮歿守備李國俊陽附逢龍從圍應城夜半賊潛梯登城國俊遽鳴鉦大呼城中驚起擊敗之脫還武昌卒死樊口時署布政使者爲葉映榴自有傳

道禪滿洲鑲黃旗人姓戴佳初爲王府長史康熙中厄魯特噶勒丹犯喀爾喀朝命中外備兵三十五年大兵三路進勦道禪奉敕往諭噶勒丹先是三十一年員外郎瑪第奉使策妄阿喇布坦爲噶勒丹掠執不屈死至是賊復誘降道禪抗聲罵賊死之

李茂吉福建漳浦人臺灣水師營把總平日不以官小自卑康熙六十年土賊朱一貴亂作自請於副將許雲戰敗被禽賊渠怪其不跪叱之茂吉舉足踢其

案案翻舊力斷縛直前奪刀殺賊賊共斫之頭腦破裂尙罵不絕口賊碎其屍
劉岷字玉巖四川保甯人由武舉從軍有功雍正八年擢權雲南東烏營游擊
佐總兵劉起元守城烏蒙夷祿萬福者舊土知府萬鍾族弟也先是府隸四川
萬鍾數擾雲南邊界雲貴總督鄂爾泰擒勦伏法使萬福父鼎坤襲職移隸雲
南時改土歸流既設東川府次及烏蒙改授鼎坤守備趣赴闕鼎坤怏怏行密
使萬福煽諸蠻爲亂未發岷密告起元爲備起元蔑視之檄萬福來見萬福懼
遂嗾衆反圍府城岷聞變解所佩刀與妻張氏訣出與起元商禦賊策皆不應
而游擊汪仁獨以撫賊說起元起元從之登城被賊辱岷遂開城率數十騎大
呼赴賊游擊馬秉倫與之俱斫數百級賊稍卻野夷數萬繼至岷遂與秉倫相
失勢益孤轉戰至次日弩穿左脅創甚北向再拜割襟蘸血大書石壁曰淋漓
鮮血透征衣報國丹心總不移十四字拔刀自刎死賊歎其忠以土覆之而去
岷妻聞變則以岷佩刀手斫二女及妾乃引刀椿喉一門同殉焉語見列女傳
秉倫既失岷亦轉山青間鏢貫其額猶手割數賊力竭跳崖死時官烏蒙通判

者爲劉鎮寶鎮寶字楚善江西彭澤人由舉人考授中書舍人發雲南用知縣鄂爾泰器其材奏擢通判鎮寶既蒞任駐大關鎮鎮距府三百里爲苗疆新闢地苗警旣急以鎮寶熟諳苗情檄往招諭至則開陳禍福詞甚備苗逆抗之反執鎮寶鎮寶罵賊烈爭斫之支體糜碎事平滇人以鎮寶與岷受害尤酷爲立廟祀稱二劉公祠

羅鳴序湖北漢陽人康熙五十年舉人任貴州麻哈知州兼署黃平州事雍正十三年春古州苗叛脅清平黃平施秉鎮遠四州縣生熟苗皆應四月陷清平縣之凱里汛去黃平新州三十里鳴序時在黃平聞變趨新州謀守禦環州苗皆起馳報府縣急援不應苗大焚掠鳴序以城亡與亡自誓客陳憲者請與俱鳴序卻之憲以君能爲忠臣我獨不能爲義士爲對相與尋後山有樹可援繫者各默識之鳴序乃解兩州印付健僕送省出公帑千付書吏藏某處曰可以死矣或曰此署事也有本州在何不去此而保麻哈或曰此新州也何不去此而保舊州皆置不聽或告曰城陷矣即趨向所識處將自經俄又告賊猶未入

則又徐與憲還登城守迨矢石器械盡城中火起無可再守乃卒與憲至後山
桂樹以死從死者數人諸生初震周大任兩家皆死之憲浙江山陰人

清史稿

列傳

忠義三

宗室恒斌

倪國正

趙文哲

吳王 璠 日 合 吳 璠 江 壽 時

孫 維 剛 曹承聞

何道深

沈齊義

陳 牧 吳 璠 等

溫模

邵 如 赫 李 南 郡

湯大奎

周 大 始 壽 嗣 寧 李 壽 基

熊恩紱

宋如椿

趙 繼 劉 昇 歸 家 壇

蕭水清

劉 大 成 王 翼 孫

王行儉

王 猷 汪 兆 鼎

左觀瀾

董甯川

韓嘉業

葉槐

陸 維 基

毛大瀛

張大鵬

白 廷 英 楊 繼 麟

楊堂等

曾艾

曾 彰 伯

羅江泰

霍永清

清史稿

忠義傳三

強克捷

總編纂

宗室奕湄

景興

總纂修

王鼎銘

呂志恒

總用之

楊延亮

師長治

王光宇

宗室恒斌字綱文太宗第十子輔國公韜塞後授三等侍衛父薩喇善官吉林將軍緣事命戍伊犁方臥病恒斌陳請代奏以身從父往詔許之而以沽名褻其職恒斌在途侍疾至廢寢食父每怒其愚無幾微怨既抵伊犁父疾以瘳將軍阿桂大賢之會哈薩克新附遣使入貢有旨擇賢員伴送阿桂即命恒斌充伴送官途間馭陪臣忠信得大體召見慰藉復其官令留京供職恒斌請畢伴送事仍往伊犁侍父允之擢二等侍衛會烏什回叛恒斌隨將軍明瑞由伊犁倍道進剿戰屢捷領左翼兵陣城南山下賊觸至恒斌奮勇擊之所向披靡賊懼隱城壕誘敵怒馬而前萬鎗齊發不及禦陣亡事聞褒恤而宥其父罪還京倪國正字懋功四川成都人康熙舉人雍正十年揀發廣西授義甯縣知縣義

甯東北曰雙江苗民雜處與湖南城步綏甯二邑紅苗接壤計千餘里隘口十堡七十二大小寨凡數百不通教化僅設雙江巡檢轄之乾隆六年楚匪黃順等煽粵苗僞稱名號國正計禽黃順中道被劫還合楚苗爲奸國正牒文武諸大府請兵撥駐四百名苗稍靖時大府意在招撫知府張永熹巡檢蔡多奇迎合其意遂撤駐兵而檄國正與多奇及縣丞吳嗣昌同往國正將行歎曰此所謂投虎以肉徒肆其噬耳行數日抵苗巢苗挾兵出逆氣鬱甚多奇易衣遁衆失色或告國正不去禍將及國正曰吾固知犬羊之性不先以威不可以德化也今日之事有死而已付健役縣印令問道馳還正襟坐待之苗突至取官弁及隨行隸三十餘人盡搥殺之禁國正土竊絕粒六日縛至烈日中去其衣掘土埋足至膝脅之降不屈授以紙筆令省中以萬金爲贖可不死國正擲筆裂紙大罵苗怒擊其齒血流被衣聲益厲齒盡截其舌國正猶噴血作罵狀遂擊死沈屍深潭事聞帝爲之輟食國正爲諸生時書抑則云爲國盡忠案頭玉尺亦刻丹心捧日蓋報國之志本素定云

趙文哲字升之江蘇上海人生有異稟讀書數行下同時青浦王昶嘉定王鳴盛曹仁虎皆以能詩名獨心折文哲爲人瘦不勝衣而意氣高邁由廩生應乾隆二十七年南巡召試賜舉人授內閣中書在軍機章京上行走以原任兩淮鹽運使盧見曾查抄案通信寄頓職時大軍征緬甸署雲南總督阿桂奏請隨軍阿桂由緬至蜀將軍溫福方督師征金川見文哲與語大悅之時溫福與阿桂分兵文哲遂入溫福幕溫福重文哲片時不見輒令人覘文哲何作已而連克金川地三十七年十月遂勦平美諾以功復中書又授戶部主事仍隨營治事三十八年兵至木果木六月小金川降者叛與金川合抄後路師將潰在軍者逆知賊大至相率逃竄文哲毅然以爲身爲幕府贊畫且叠荷國恩詎可捨帥臣而去卒與溫福同死同時遇害者刑部主事王日杏新繁縣知縣徐瓊鄆都縣知縣楊夢槎合州吏目羅載堂其在各臺站遇害者潼川府通判汪時漢州知州徐諗內江縣知縣許椿大竹縣知縣程蔭桂秀山縣巡檢郭良相納溪縣典史許濟其沿途被害者候補從四品王如玉候補知縣孫維龍張世永

布政司照磨倪鵬候補縣丞倪霖秀山縣典史周國衡先後殉難者又有重慶府知府吳一嵩原任貴州大定府知府鍾邦任刑部主事特音布原任湖南澧州知州吳璜原任浙江雲和縣知縣彭元璋四川崇慶州知州常紀原任廣西越嶲廳通判吳景納溪縣知縣章世珍營山縣典史吳鉞幕客同與難者朱南仲楊紹沂熊應飛田舒祿顧佐岳廷栻周煒鄭文許國長炳王鳴鏞十一人事定四川成都府金川崇化屯先後建祠祀之均建慰忠祠碑日杏字丹宸江蘇無錫人善書於魏晉以降書蹟臨摹畢肖官中書行走軍機處每扈從行圍遇公事旁午坐馬上盤一膝置紙膝上信筆作小楷疾如飛有官中書者見機要大臣蹠一足請事日杏怒詈之謂爲非人知銅仁府民以王青天稱之汪時浙江錢塘人時駐俗多喇嘛寺寺破罵賊死官軍收復小金川見血影灑涅壁間尙漉漉如溼焉程蔭桂浙江仁和人與其子烈同遇害孫維龍字普田寄籍宛平先官安徽黟縣知縣創立書院延劉大槐教士又建石橋於漁亭鎮通浙楚往來行旅稱之吳璜字鑑南浙江會稽人父煥文舉博學鴻詞科璜爲商盤甥

早以詩名常紀字銘勳奉天承德人以進士選授西充縣有治行嘗興建關神武祠殉難後縣民即關祠肖紀象祀之吳鉞字炳臣河南固始人賊犯木果木時鉞守澤多耳糧站去大營六十里大營以東澤耳多以西松林溝赤里角溝俱爲賊奪事急有勸鉞走者鉞奮然曰吾奉命守此與站存亡分也與我共殺賊者吾骨肉也因拔佩刀立木城旁曰敢言走者斬衆心稍定賊至鉞率兵役禦之衆寡不敵火器環擊木城猶徒手抵賊卒被戕

曹永闡字文甫浙江金華人雍正七年武舉人補江南大河衛千總海攏四川海甯營參將御士卒嚴而有恩多樂爲用乾隆三十六年隨溫福征小金川提督董天弼檄守牛廠石卡旋爲賊據天弼自劾並請治永闡罪上念小金川事棘置未問永闡迺與阜和游擊宋元俊獻三策一自斑斕山探小金川擊其首一自美諾趨甲金達擊其中一自約咱進取僧格宗擊其尾用其言頗效永闡善謀謀定而戰元俊諳地利進退有度軍中曹宋齊名不數月悉復明正侵地前後十餘捷三十七年隨攻克布朗郭宗底木達執僧格桑父澤旺以獻明年

師以賊扼險不得進別取道攻昔嶺移營木果木未嚴備山後要隘而賊突薄大營劫糧臺奪礮局會連糧士卒數千爭避入營溫福堅壁不納蟲而潰賊蹂入溫福遂遇害是時永開軍距稍遠聞礮聲遽嚴甲起飛騎至曰大營失矣問大將軍安往曰不知傍一騎至曰宜速退叱曰大將軍不知所往吾將焉往即蹀血進殞於陣同時殉難者參將惠世溥以下四十七人

何道深字會源山西靈石人由武進士乾清門侍衛出爲貴州提標游擊乾隆三十二年兵部尙書明瑞總督雲貴進討緬甸集諸道兵明瑞聞道深訓練營卒可用檄至永昌果整練冠他軍三路出師以道深所統自隨從取木邦破錫箔踰天生橋大戰蠻結賊立十六寨豎木柵列象陣力拒道深冒矢石攀柵先登火槍中右額紀功第一又從入窮乍去賊巢阿瓦城益近賊斷木壘石守隘官軍糧少火藥鉛丸垂盡將旋賊抄其後道深爲之殿遇山谷險阨必奮戰俾全師得度至猛育未至猛育前二日道深中烏槍夜息部下校進曰傷重矣賊至日衆道險難與敵蓋稱病且逸歸乎道深曰賊衆乃將卒致力時也叱之退

明日戰益力初明瑞將中軍趙錫箔別將分左右軍異路約會師及至猛育兩軍淪約前阻大山賊盡蹊蹊隘環圍數重軍殺馬以食三十三年二月明瑞令夜拔營以次衝出平明賊來邀截道深立高岡指揮拒之他軍士得從旁脫出道深自晨戰至日中被數創始仆道深撫士嚴而有恩其始聞檄調也令二日即行凡無子無兄弟者皆弗從歿後軍皆悲涕以其帶髮還詔賜葬本邑

沈齊義字立人浙江烏程人乾隆九年舉人大挑用知縣發山東歷權冠汶上費齊東等縣題補泗水齊義有吏能初往鉅野辦振慮吏胥作奸親自登記歷數十里皆然冠有剪辮訛言謂妖人剪人辮髮能以呪語攝其魂令移他處錢物入已被剪者數日即死訊無實悉縱去他縣獄上皆獲譴人服其識汶上爲入都孔道東門外石橋久圯撤而新之南旺蜀山馬踏三湖爲漕渠水櫃隄壞出資修築工固而民不擾泗水多閒田而民間畜蠶者少悉令栽桑飼蠶自此隙地皆桑繭絲之饒甲他邑費有冤獄特緩其事或以吏議懼之齊義謂與其令民以冤死毋寧被劾以去官三十七年改授壽張縣境趙王河湮三十餘年

大雨至水無所洩禾麥皆淹死民多逃去請募夫開濬凡三十餘里上引范漢諸水悉達諸五空橋自是南鄙無水患民皆復業故明藩府私田賦極輕入清謂之更名地部議加賦壽張更名地二千四百餘頃先於雍正間歸入籽粒地加賦而舊名猶存乃檢尋故牘以原委達大府削除之故事歲辦河工稽料及解京黃蠟分里購買吏用爲奸爲往他所買解民得免累所至求民利病若其身事三十九年八月二十八日夕陽穀縣黨家店奸民王倫糾衆突起爲亂入壽張齊義聞變即衣冠出蒞宅外斥曰吾非賊吏爾等劫我何爲賊伏拜曰知公廉民等亦素沐公恩但須及早從順順則生逆則死齊義駭曰爾等不顧赤族誅耶大罵之賊謂齊義不知生死麾衆退令自爲計齊義即入解其印令掘坎埋之復出家人及賓友挽其臂揮去趨宅外僕又牽馬至請上省告急齊義曰若將使我蒙面見上官耶批其頰斥之須臾賊復至有泣拜求請者齊義大怒拳足交下賊擬以兵齊義毒罵不絕口遂攢殺之先數日齊義聞陽穀有妖人衆衆遣人四出偵刺賊懼禍及首刼壽張故齊義罹於難賊既破壽張遂掠

陽穀堂邑縣奸民王聖如亦劫殺村落應倫權縣事陳枚死之枚字元幹廣西全州人由舉人揀發山東用知縣聞聖如亂作即馳往搜捕盡逮賊黨妻子繫獄而聖如以倫衆數千至邑無城守具人情洶懼枚本攝任將受代或勸枚引去枚指天曰自誓與城存亡城陷被執怒目視賊賊曰攝令爲令清赦勿殺枚愈怒髮豎毗裂罵曰汝輩罪不赦乃敢云赦吾耶脅以刃不屈其弟元樑奔救手刃數賊賊縛枚及元樑至王倫屯倡令跪仍不屈賊先斷枚兩足又斷兩手旋支解元樑弟兄同時死堂邑訓導吳璦福山人年七十餘矣携姪文秀及僕王忠到官賊劫學署見其老置不問璦叱之詞甚厲賊怒殺璦及文秀與忠陽穀縣丞劉希齋典史方光祀壽張營游擊幹福調守陽穀莘縣汛把總楊兆立堂邑汛把總楊兆相等亦先後被害

溫模字孫朗福建長樂人入貲爲吏目發甘肅借補通渭縣典史乾隆四十九年鹽茶廳逆回田五倡新教作亂衆石峰堡遂犯通渭模以回民馬世雄預告知賊計爲之備知縣王樓惟怯不任事模乃與縣署幕客邵如椿縣紳李南暉

同時城守模率兵民登陴禦賊凡七晝夜士皆用命糧盡請開倉給守者懷持不可城將陷馳返官解正衣冠北向拜鍵戶自經死世雄戰死如椿浙江紹興人父以中韓術遊陝西因占咸甯籍補諸生如椿就懷聘事急乃立城闔袒而大呼曰好男子當從我守城殺賊應者數千人令壯者執刀矛老弱運甓石並集城上而身率猶子曾燮登西埔以當賊衝城庫薄賊蟻附上手短刀格鬥良久力不支被執賊方肆戮猶大言曰首議守城者我也何多殺他人爲凡被十三創曾燮被十一創均罵不絕口死南暉由舉人於乾隆三十年任四川威遠縣知縣以疾告歸先於逆回蘇十三肆擾通渭有守禦功至是又率子思沆猶子師沆召募壯夫百五十人助城守累擲大石殺賊城陷巷戰與子思沆同罵賊死師沆自經死安定縣典史費元燈亦以奉檄偵賊被害

湯大奎字緯堂江蘇武進人乾隆二十八年進士授福建鳳山縣知縣五十一年冬臺灣賊民林爽文作亂起彰化其黨曾伯達等應之南竄鳳山縣故無城僅土垣三尺許時大奎已秩滿候代屬賊勢蔓延乃率僚佐募鄉勇日夜守禦

賊來攻與參將瑚圖里擊卻之瑚圖里馳馬逐賊去大奎聞城北有警捕內應四賊斬以徇方獎厲兵役賊突進北門入縣治典史史謙死之大奎朝服坐聽事手劍擊賊賊刃交下猶瞋目冒不止長子苟業從之官先以父詩文稿畀其戚令遠避身佩刀蔽父不去同遇害大奎初喪其元城復後有僕賊大奎繫髮纏形容亦約略可辨因併入棺孫二貽汾自有傳謙字昭和順天宛平人先遣子義戰奉大母出避乃與大奎同城守死後亦喪其元爲百姓竊埋之賊退始改殮周大綸字理甫直隸天津人乾隆二十年由貢生捐職州同發福建補臺灣府彰化縣丞數年知民頑憂形於色屢言於上官斥不信任滿將引見假公事滯諸羅亂作大綸奮入縣治縣令懦甘以身殉大綸曰國家建官命能守不命能死坐致民逆死以塞責小丈夫也激之弗應爲謀所以禦賊計夜賊入據縣治有見大綸者縛去不殺而勸之降大綸大罵之賊擣其頰撫頰大哭曰此願乃爲賊汚首觸柱額裂囚數日卒遇害大綸僕陳德以護主不去大綸死以頭格賊支解死壽同春名星以字行浙江諸暨人習文法客臺漳淡水廳同

知程俊署年七十餘矣竹塹城陷俊先以出捕賊遇害俊子携印走同春爲賊執作爲所用賊留其黨三十六人守城而自出掠同春客淡水久胥徒皆熟習士民皆信服潛爲糾合其衆出不意就同知聽事駢斬留賊即日閉城門爲朝廷守賊聞大駭悉衆返攻同春部勒其衆日夜登陴樵蘇旣斷發屋掘鼠爲食得間輒出選鋒擊賊相持數日賊稍引卻道通署同知徐夢麟始以印至次第招撫附近脅從者夢麟一切倚同春辦治是時首逆負嵎據大里杙自固官軍環營其外疑莫敢入同春草書與夢麟令上軍門速攻之久乃得報合六路進勦同春率官軍從西路入而鹿港之兵遷延失期旣入無援馬蹶被獲賊恨同春久至是喜得報攢刃交解之又廣東嘉應州人李喬基者名安善以字行善少林拳術客臺灣見土豪嘯聚相讎殺歎曰亂將作矣乃簡僑寓南北莊人團練之亂作郡城大震召諸健兒曰賊衆一閔而出遂破彰化淡水諸羅三城所不即取郡城者懼粵人躡其後耳吾出兵牽制之賊至則守去則擊相持久則援師且至賊不足平矣集萬餘人莊爲柵里爲臺計畝以爲糧一莊有賊諸臺

應之賊數至皆不得逞十二月率三千人從知縣張貞生復彰化已而糧盡士卒多散去城復陷明年正月復從總兵柴大紀復諸羅自起義兵與賊二十餘戰斬馘萬計賊銜之以萬金購喬基首二月喬基與從子舉柏率健兒數百人赴鹿港請火藥爲賊所偵還至青塢伏發禦之殺數百人賊大至矢石交下突圍出失舉柏喬基三入賊中傷左股被獲諸健兒皆戰死賊誘喬基降罵賊賊斷其舌縛而射之猶不屈乃磔焉至是白衣冠哭者萬餘人皆誓不與賊俱生也是役也死事之烈以喬基爲最

熊恩紱字隆輔廣西永康州人乾隆十七年進士父疾意不在試以訛脫列下等歸本班選用選授直隸永安縣知縣累遷永平府知府四十三年高宗東巡召對稱旨擢蒞昌道改大順廣兵備道爲政務持大體尤慎刑罰時語人曰慮囚但久跪索供感寒濕即病足或發他疾皆足致死豈獨三本能斃人也始單縣有劉某者習八卦教煽惑鄉里官捕而殺之械其子於獄人復就獄中傳其術從者益衆自山東河北直隸境無慮數萬人而段文經故胥吏以事斥革家

居性險詐屢挾數以役人羣服其黠奉以爲帥立期劫單縣獄圖攻奪州郡恩
紱聞之下元城令密捕所在匪黨而郡縣吏皆通賊多爲耳目者走白賊云將
屠滅汝等賊賊且恚突於五十一年閏七月十四日夜半毀道署入殺恩紱恩
紱聞譟聲疑失火旋知有變亟還令人守庫舉印授妻繆氏挺身出大罵賊攢
刃斫之賊固與其黨有成約以先期起事不及應戕恩紱後即散劫郡縣署皆
以有備不獲逞故鄰境得以次禽獲恩紱被害尸面如生兩手猶作搏賊狀家
人以守庫被殺者六人印以繆氏匿之得無失恩紱逆折賊謀不至如三省教
匪蔓延不已躬犯大難論者多之

宋如椿漢軍鑲紅旗人以寶慶通判權乾州廳同知乾隆六十年正月黔楚苗
石柳鄧石三保等叛廳苗響應居民爭避竄如椿召諭之曰若屬先人邱壟皆
在不可棄同知地方官當爲若效死守皆許諾已而賊勢張甚棄去者大半如
椿被髮徒跣周走號呼勸之守自旦至夕不絕聲訖不聽賊旋攻西門如椿仗
劍出禦傷左骭歸北向再拜自刎從人張忠在側固遣之弗去亦被創死方賊

攻急如樁度不能支呼巡檢江瑤佩廳印令赴辰州求援瑤出城遽遇賊死其子朝棟挈印送辰歸覓父屍與家屬俱遇害趙福湖南零陵人由行伍隨征金川有功累擢至鎮筵中營守備逆苗滋事駐守淶溪口淶溪爲鎮筵糧道約士卒嚴民安之五月官軍從狗腦巖潰歸賊衆近萬人謀絕糧道攻之急時守兵先抽調其半民請福避去福曰兵衛民將統兵爾輩可去吾奉命守淶溪去一步卽失職苗至福怒馬奮槊當先拒之殺數十人苗分番更戰民以福不得食爲納橐餗福揮去之且曰賊之不遽追戮者以我在也我死合力追汝無噍類矣民泣涕去麾下五十人感福義無一逃者戰一晝夜溪橋被撤卒死且盡手過山槍三發斃苗數十人指掌焦爛不能持身被數創投溪死民隔溪望者咸痛哭苗旋散去難民數千賴之全活後架數椽祀之曰趙將軍廟劉昇邵陽人寶慶協把總從副將某征苗副將逗留不前昇於衆中出謾語某銜之師至狗爬崖令率百人爲前鋒約舉白旗爲後援昇策馬轢陣賊不能支偵無後繼復悉銳搏戰昇連舉白旗旗失復解所服白袍招之某故按兵不發昇戰死百人

殉焉死極慘首體糜粉無可收瘞者後祀昭忠祠主入時旋風暴起吹氣作血腥襲衆幾仆時以鄉團死最烈者有滕家瓚家瓚湖南麻陽人諸生有膂力能負鐵礮擊賊捐布政司理問職銜居高村與乾州苗接壤乾隆六十年逆苗掠麻陽家瓚同兄監生家瑞弟武生家瑤悉出家財鉅萬設卡堵禦有功自正月至四月共打仗十八次殺賊八十餘名賊恨之總督福康安寵異家瓚家瓚爲盡破賊策甚備一日家瓚率衆守溪口賊驟圍其居曰出家瓚禍可已族弟武生家泰挺身出語其村人曰豈可惜一身而害一村遂大罵賊自承爲家瓚賊剝家泰皮至死不更一辭又執其家口始知非家瓚也全家被害家瓚聞而馳救無及請官兵援助官軍忌其能不助一卒且檄調鄉兵他去家瓚復往溪口與衆共守賊急攻之力鬥死

蕭水清字廣銓廣東平遠人以監生納捐發湖北補保康縣典史嘉慶元年二月白蓮教謀反姚之富齊王氏起襄陽曹海揚祁中耀起房竹王蘭曾世興起保康衆各數萬齊王氏掠州郡與王蘭會保康之白溪溝賊黨楊昭爲內應水

清計禽之徇於衆賊銜之時守城兵以勦苗他調縣令畏賊他往城中空虛水清給印札曉諭四鄉激以忠義賊遽至縣城故庫薄水清拒守殺賊過當厯五日夜不懈遣勇健詣郡乞援爲賊得圍益急水清知不可爲旋署語其妻曰吾義不屈爾其自爲計妻誓先殉子其馨等及家人皆願從死遂出城已陷遇賊縣治前罵賊死焉教官黃義峰吳珍義子其馨其芳族子祚超妻弟林鳳良同殉之妻林氏子婦韓及孫女與僕婦婢女等皆闔戶自刎水清死後鄉勇始集皆頭插小青箬爲識以別賊從援軍禽賊首王蘭曾世興小青箬者即水清印札之號令也賊旋犯竹山竹山縣知縣劉大成江西新昌人乾隆四十六年進士選授蒞任縣界萬山中故有專營駐防亦以勦苗他調留者僅百名大成先捕得賊黨有約期搶據竹山語即飛牘告急且與僚屬謀曰吾守具未完爲賊乘必困不如出據險要相機堵禦方派撥間賊已據保康乃以典史吳國華守備孫掄魁分守縣治及隘口而自守武陽堡當其衝納縣印於懷據險設伏遶健足偵探終夜無少休賊突越後嶺入縣焚掠國華掄魁俱不支先後至武陽

大成復率以赴勦槍斃十數賊來益衆遂退往武陽國華掄魁方出點兵大成乃遣親信出探隘口比反大成已肅衣冠佩印北向自縊矣國華掄魁踵至愕然亦殉焉別股賊犯襄陽呂堰驛巡檢王翼孫亦以拒戰死翼孫江蘇長洲人呂堰當驛道之衝無城可守翼孫聞變募鄉勇戒備而賊已大至翼孫率衆迎擊殲先鋒三人遂登大橋禦之賊來益衆鄉兵潰又手刃數賊賊矛環刺受傷重跳而投於水賊以鈎起之攢刃毀其尸翼孫初至任預立禦賊章程一鄉勇十設頭目一頭目十設總頭目一各相鈐制統於巡檢司附近村落單丁獨戶皆遷於鎮選壯者充鄉勇設哨探定功過儲糧秣練刀仗禁飲博其區畫爲甚備云

王行儉江蘇溧陽人由舉人大挑知縣發陝西補南鄭縣以承審命案不實褫職嘉慶元年投効軍營二年教匪竄汝河以平利縣防守嚴向東南偏白土路營時行儉帶兵六百名偕都司趙禧禦之賊分股前後夾攻禧中刀傷歿行儉罵賊不撓身被矛傷十餘處陣亡以離任文員帶兵協勦罵賊捐軀詔深恤之

王銑字麗可江蘇武進人以四庫館膳錄勞授華陰縣丞性介不合上官先調守山陽豐陽紫糾義勇八百餘人皆鋒銳可用銑被豐陽知縣檄入城共守禦義勇以所將非人被殲銑爲建祠山陽南關勒石誌名姓哭之三年調至洵陽佐理撫卹事縣令圖與銑分吞振款嚴斥之縣令恚圖中傷銑以行臺省需餉急薦銑行至雒南廟溝坡坡高二里銑已北下坡家人甫押後隊踰坡脊賊高均德大隊至坡南探騎二縱轡馳上家人大呼速銑下馬避賊銑不應探騎至坡脊馳下來夾銑去幾一里復馳回一騎以矛剔銑面一騎就刺胸及脇皆洞穿而死同以運餉死者四川省有汪兆鼎兆鼎字子元武進人亦以四庫館勞授直隸棗陽縣丞以事褫職赴四川軍營投效未用四年同郡朱向隆爲達州巡檢有解餉之役邀兆鼎偕至東鄉縣太平石岸遇賊向隆跳衆謂兆鼎非蜀官盍亟避兆鼎弗應乃各奔兆鼎獨守餉罵賊被害

左觀瀾字緒川江西永新人大挑知縣發陝西權五郎廳通判五郎扼要川陝無城觀瀾莅任既募鄉勇訓練即牒大府捐廉雇役築土城躬自督之

半月工竣三日而教匪至悉精銳啓城追勦斬獲甚衆數日賊突出別道薄城衆寡不敵請援又不至觀瀾乃召子承蔭等勸之皆泣對曰願從死即分兵乘城夜多燃炬束老弱大呼譟賊不知虛實引去將軍德楞泰明亮至詢狀驚歎遣守備率兵駐城中聽觀瀾節制城守益堅民樂爲用以勞補安定縣西安府敝巡撫留之巡撫悟立止毋去任而賊果悉衆至見觀瀾立城堙咸錯愕觀瀾諭賊降次日二百餘人至觀瀾納之守備欲殲以要功觀瀾不聽乃庭集降者曰汝等欲終從賊即聽去降者稽首謝不敢以後至六人不可信令降者自別之果於裏衣得賊黨所以爲識者卽斬之投六首城外賊駭遁去三年賊復大至觀瀾昇大礮城上爲禦手發礮斃賊無算觀瀾亦以礮裂傷顙負痛解佩刀付承蔭畀歸署亟遣人問道請代乃卒後二日援兵至承蔭泣叩軍門願復誓總督那彥成哀而壯之俾隨官軍勦賊四年十月蹙賊沙溝口力戰陣亡猶手父佩刀不可拔父子俱歿王事賜卹尤厚觀瀾事繼母以孝稱兄觀海官上思州知州時有兄弟爭財者適得思州書念弟甚引蘇軾世世爲兄弟句觀瀾讀

而泣下付訟者兄弟令閱訟者咸悔泣謝去

董甯川直隸永甯人由武舉選授貴州鎮遠鎮標守備隨剿苗匪嘉慶元年累擢至湖北興國營參將三年隨總兵諸神保等軍剿教匪賞健勇巴圖魯名號復隨副都統額勒登保進剿終報山偕都司張廷楷等自西入奮勇奪山隘官軍魚貫上併力攻擊禽首逆覃加耀等股匪劉成棟張漢潮張添倫分擾巫山荆門及撲闔楊坪邊隘先後擊敗之四年五月股匪高均德竄雲路溝邊隘偕游擊姚國棟合攻賊奔梓桐壩復偕都司劉應世由我坪迎截殲二百餘名餘匪潰甯川見有騎馬二賊目追益力至樹林中賊乘馬遁甯川令弁兵圍山腰自率弁兵數十下馬追入深林賊併隊轉門甯川中矛傷仍手刃十餘人斃騎馬賊一人力竭歿於陣事聞詔曰董甯川下馬擊賊至被戕害似此忠勇之臣不能承受國恩爲之墮淚命直隸總督胡季堂贈甯川母命湖廣總督倭什布送甯川子及家屬歸原籍皆出異數云

韓嘉業字健庵甘肅武威人父增壽官涼標千總隨征金川戰死嘉業誓報父

仇入伍有功累擢至陝甘督標游擊嘉慶元年四川教匪滋事陝西興安府屬地相接奸民乘機蠢應踞安嶺爲巢穴憑高恃險立木城又於高廟山設立大卡形勢陡峻嘉業奉檄率兵由羊毛子堰進克之復會他將進徇安嶺遣健卒潛燒木城賊驚潰乘勝取大卡禽戮無遺擢參將四年復敗李樹之股匪追出班鳩嶺賊竄六道河嘉業循河右追賊至廟子壩賊遁入川境未幾賊又由川界老林入南鄭時嘉業循江防守聞之亟率兵前駐法慈院堵其北竄賊將就淺涉嘉陵江而沔縣賊三四千人由阜川徇近官莊陝甘總督松筠令嘉業偕直隸守備麻允光擇要迎擊賊全數出甑峒子嘉業馳馬首先衝入賊分兩翼繞馬家嶺自上壓下四面合圍嘉業力戰突擊馬蹶復箭殺執旗賊賊以矛直刺甘肅鎮標把總高騰蛟從旁格之遂殺持矛賊而羣賊競進嘉業中矛仆遂死騰蛟以身蔽其上亦死允光亦戰歿事聞優恤諡武烈後嘉業兄莊浪協副將自昌亦陣亡暨屋命共建一祠賜名雙烈

葉槐字蔭階浙江錢塘人父文麟官陝西權孝義廳同知教匪竊秦中槐聞警

省父即具牒軍門自効嘉慶二年正月奉檄率鄉勇勦賊於光頭山賊旋由河南盧氏竄商州與孝義接壤隨父乘障堵截賊不敢入別股賊復由漢中東竄將由鎮安五郎逼孝義復佐父堵禦凡團練首領可用者必傾身交接以是豪健依附者甚衆西鄉急請援槐選其鋒赴之比至賊即北竄城固洋縣有警又率以往賊遁入山部分其衆守通棧要路而自逐賊入虢川等處陣斬賊獲騾馬器械均無算賊東奔大峪口孝義在重山中無城郭槐慮不能當請援孝義大府不許槐不自安拔營東追果遇賊會別部兵至謂遇賊得捷賊未必再犯孝義阻其返槐終慮孝義被困復言於大府謂不發兵即單騎行矣詞氣激昂聞者色變大府乃許撥鄉勇一千六百人隨槐行抵孝義賊果至乃據險結營令四山放號火以張聲勢西南賊尤勁鄉勇人人思門遂破賊前隊斬其酋三人賊稍卻大隊來攻復併力衝殺賊無可乘乃解去大府調其父權富平槐亦入資爲縣丞當就選戀父不行留大營司偵候事會賊渡漢江徧洋縣醴泉縣知縣陸維基請行舉槐爲助慨然偕往維基帶勇練登手扳崖至巔遇賊罵賊

死槐數突圍不得進左旋至山梁力竭賊矛刺腰大創死僕四人皆從死槐以衛父至而卒死於兵時皆壯之維基順天大興人

毛大瀛字海客江蘇寶山人少以能詩名爲練川十二才子之一由附監生充四庫館膳錄用州同發陝西累爲河南巡撫畢沅山東巡撫惠齡調用大兵征廓爾喀惠齡督四川辦理濟隴糧務檄大瀛赴西藏差遣事竣留川補用借補潼川府經歷以軍功擢授中江縣知縣嘉慶元年檄赴湖北軍營隨勦教匪復以軍功擢授四川簡州知州時惠齡由湖北入川沿路勦賊大瀛從之四年回簡州任五年股匪張子聰竄潼河擾三臺中江地官軍分路截勦賊復分擾遂甯樂至等處由金堂之廣元寺肆行焚掠及簡州境大瀛率鄉勇前往堵禦行抵土橋溝馬步賊蜂至力戰遇害大瀛屢入督撫幕府工牋奏業此者二十年山東巡撫國泰爲在京舊交國泰性暴戾獨敬事大瀛國泰被嚴譴大瀛盡始終之誼爲時所稱卹世職孫嶽生襲嶽生亦以詩文名一時

張大鵬陝西紫陽人子楚常希賢紹堂孫應朝應邦應選皆諸生餘皆布衣家

世以忠義爲教嘉慶元年賊犯紫陽洞汝二河官軍未集大鵬率子孫出家財募鄉勇八百餘人助有司禦賊掠龍形響水二溝楚常率衆進擊之殺三人遂前攻賊寨山峻霧作中傷歸後三日賊至大水溝觀音堂地紹堂殺賊魁六十餘人又三日希賢與賊戰桃園復殺三十一人當賊之起勢猛銳官軍亦避其鋒至是連見殺傷大憤遂率黨數千人至希賢首出逆戰中槍死紹堂據險隘復爲賊殺大鵬氣益奮更率其孫應達應祿應愷應試等持械深入衝突躍呼所殺傷甚衆卒以衆寡不敵皆戰死初張氏父子及孫凡十二人自賊之興戰死者七人溺死者一人傷者二人陝西以鄉團死者又有與平人白廷英廷英縣舉鄉飲賓嘉慶二年教匪由蜀渡漢江而北衆十餘萬終南近山無完村廷英督鄉人築村後張家寨避之三年二月賊自城東窺寨寨人不二三百賊急攻槍矢雨下丁壯悉潰賊蟻附而登廷英罵賊死弟廷才廷揚從死賊俱焚之次子筐廷英頭去賊逐之筐倒頭落山下後得於谷底屍則焦爛不可辨矣廷英年七十五凡以守寨死者八十餘人是年四川各鄉團之死難者爲廣元

人楊繼曉世居高城堡繼曉姪十三月而生既壯以氣力伏一鄉捐職州同知隨父璽蘇州督糧同知任所聞教匪擾蜀歸省母時巴州已破繼曉與同縣貢生楊嘽等倡議團練罄家財得千餘人請縣令給劄爲守禦縣官不省散去賊破南江距縣境長池數十里縣令始速繼曉出禦以烏合一散不易集議先虛聲撓賊作高城堡人自相要約語列名至多書投賊營賊果遲疑不遽進會陝賊姚之富等數萬人穿老林出將至德山木門賊亦以數千人將至通坪通坪居高城後德山互其脇長池枕其前繼曉謀於衆攻長池者縣官自禦之而自任後路夕漏三下與族人楊冕率衆出木門之橫江梁遇賊先鋒門之賊大隊至不可敵乃據險趣嘽濟師賊登山瞭知兵少無繼合圍擊之繼曉手刃數十人力竭被執至九曲坡欲誘降之大罵不屈賊刳其腹而焚之從戰者皆被戕嘽以三百人來援至則皆歿楊氏一門亦盡殲

楊堂梁崇李培秀皆廣東嘉應州人堂官四川蒼溪縣典史崇官陝西咸陽縣典史培秀官陝西試用典史嘉慶三年王三槐擾蜀大軍追勦急亡命四竄堂

守永興場士卒譚曰賊至矣皆欲走堂手劍叱曰賊未至而棄糧法當死孰若守糧而死也賊至死之三年大軍駐鎮安勦張漢潮梁率鄉勇勦鳳皇嘴賊散解囚回省至孝義廳遇賊崇釋囚七人曰若曹於法當死然死於賊則枉吾不忍也可速去毋從賊余義不可逃死其所矣賊至被執不屈死五年培秀從大軍挽粟至四川大寧縣與賊遇盡委輜重於河遣其僕曰速報大營賊不得糧必掠東郊截而擊之可盡覆也吾死不及見矣大軍果破賊訊俘言培秀死時賊不得糧被二十一創云初崇所釋囚七人皆歸獄報崇死事狀曰吾不負梁典史也至是七人皆赦

曾艾字虎卿湖南新化人嘗割左臂療父疾以例貢考授州同發江西署安福等縣艾夙爲嘉勇貝子福康安所知辰州苗變隨福康安軍令守麥地汛從克諸砦有功嘉慶元年補貴州永豐州分防州同州隸南籠故苗地州同駐冊亨在萬山中尤險遠難治艾督各砦守本業民夷悉安二年遣人迎眷口甫至而南籠狃苗七柳鬚等遽叛艾聞警約駐防把總外委堅守並諭四鄉亭目招集

良苗繕城治械令出肅然賊至部分守禦自出城奮擊往來策應城中婦女亦改裝登埤相持半月援兵卒不至賊衆數萬圍益急手發矢斃執旗賊魁北門火起率隊趨救遇賊城西隅巷戰中槍死僕九人從死兩妾聞訊皆自刎次子爲其戚携出號泣曰吾父母皆死何以生爲賊尾及之亦中槍而殞事聞皆予恤改南籠爲興義府永豐爲貞豐州艾同族彰泗字孔林以拔貢生朝考用知縣發陝西授延川縣嘉慶十年權洋縣時教匪被勦勢衰以終南山爲窟穴搜捕不易朝議改五通通判爲同知添設甯陝鎮總兵募兵六千改十大營鎮之而以積年立功無業可歸之鄉勇充伍爲善後計名曰新兵新兵素難御司儲者又誤扣米折於是陳先倫陳達順等於十一年二月作亂戕官連破營城十九處偏洋縣彰泗拒守七晝夜援兵阻河不能至城陷彰泗死之民保其眷屬潛出故不及於難

羅江泰字靜波浙江黃巖人家貧習賈去賈投營由外委歷擢游擊皆在浙由參將至副將在閩總兵又在浙前後與提督李長庚相左右而在閩功特顯長

庚銳意勦海寇蔡牽專意外洋凡閩內事均以屬江泰賊船高大官軍仰攻失利檄江泰造寇艇艇成陵賊船賊大困南走福建江泰於白犬洋四礮嶼頭東礮各役俱有功護海壇總兵遂赴南洋合金門總兵何定江截牽去路橫擊於銅山追至浮鷹洋賊衝礁走匿山上江泰搜山禽賊目王朱又焚賊船於仰月橫山賊皆墮水死在閩逾年凡十擊賊號敢死軍賊見江泰軍輒引去撫總兵鎮金門九年移鎮定海是時牽南竄臺灣長庚正總閩浙水軍同心戮力督殺牽十年九月牽船泊道頭忽遁去江泰從甌洋會八總兵追之至盡山失牽所在黑雲起海上亟令移港風驟至白波山立羣舟相擊觸頃刻破碎江泰大船帆重不可下下及尺船遽不知所終朝命沿海各省探訪久之無得者葬衣冠黃巖

霍永清字肇元廣東南海人居瀾石鄉膂力絕人嘉慶十四年海氛未靖大吏行封港策海賊無所得食相率蹂躪旁海各鄉漸入內地所過焚掠怯懦者遂以欵賊爲得計八月賊聯數十艘由陳村平洲小圃直抵瀾石衆議欵之永清

曰彼恃舟楫爲利今深入重地自取死耳好男子從我殺賊何爲低首求免乎主款者陽受約賊至從壁上觀永清獨率鄉勇堵禦相持一日夜賊稍卻明日督勇再戰而款賊者導賊從村後掩入腹背受敵力不支中礮仆地左右五人並死之鄉人以永清以死勤事建祠祀之名祠曰愍義

强克捷陝西韓城人嘉慶十三年進士即用知縣發河南補滑縣十八年九月教匪李文成謀亂期十五日與伏京城賊林清中外同起事克捷初莅滑有退吏某方訟繫爲白其誣出之吏調文成等逆謀告克捷歷申於守不應初六日突執文成嚴詰謀叛狀笞斷其脛及黨二十四人鐐之獄夜半其黨牛亮臣突刼文成出攻某吏屠其家踞城以叛克捷及家屬俱死之後文成焚死輝縣林清伏誅京城詔克捷首先訪獲逆黨俾二逆失約敗謀後先授首實屬功在社稷優恤諡忠烈祀京師昭忠祠於韓城滑縣皆建崇祠與難者均予附祀並以前大學士王杰同隸韓城士風淳茂永廣文武學額各五名在城者老岸鎮巡檢劉斌教諭呂秉鈞典史陳實勳同時預難把總戚明彰以拒賊陣亡均闔門

殉節逆黨赴朱村說降諸生朱繼連不屈率村人戰歿滑縣變作黨徐安國起長垣知縣趙綸又黨朱成貴起曹縣知縣姚國旂陷定陶知縣賀德瀚均死之綸浙江錢塘人國旂安徽歙縣人林清將爲亂金鄉縣令廉知其謀卽羽檄各縣皆不之信國旂以幕友吳星萃力陳利害乃爲緝捕計以吏役多通賊故賊攻縣治急求星萃甘心先國旂攢刺數十創死德瀚長沙寧鄉人事急令家丁賁印赴府告變幕友朱樹堂等皆死於難在籍洙泗學院學錄孔毓俊等則率鄉勇助官勦賊戰死奮義村林清果於九月十五日率逆黨持械闌入禁城頭等待衛那倫應值太和門聞警趨入有勸其緩行者不聽曰國家世臣當此等事敢不急趨所守耶至熙和門門閉賊蜂至被戕那倫者前太傅明珠後也宗室奕湄鑲藍旗人由筆帖式累擢至內閣侍讀學士四年命以頭等待衛爲和闕辦事大臣六年七月回部逆裔張格爾入卡滋事勾結喀什噶爾回衆爲內應帝以和闕附近命加意嚴防八月賊分擾葉爾羌命揚威將軍大學士長齡帶兵往勦取道和闕奕湄派綠營弁兵前往策應諭奕湄隨時查探彼處實

在情形如葉爾羌見在被圍當令迅速相機前進仍嚴防後路毋墮賊計否則即留兵和闐防堵以壯聲威旋以葉爾羌失守賊四出滋擾奕湄仍回和闐駐守賊偏城下援兵未至城兵僅八十餘名奕湄晝夜嚴防力竭城陷死之幫辦大臣桂斌同與於難

景興李佳氏滿洲鑲紅旗人駐防伊犁官佐領嘉慶二十五年喀什噶爾卡倫外布魯特滋事伊犁將軍慶祥以景興熟悉回情奏派馳往查看經參贊大臣永芹奏留署協領事道光六年六月張格爾復率布魯特滋事慶祥又令馳往偵訪設法進勦旋與七品伯克帕塔爾生擒奇比勒迪之子姪縛解來城伏誅又探得張格爾與從前滋事汰劣克一處居住即乘其未備勦殺逆回百餘名生擒楚滿一名奏入帝嘉之是年八月喀什噶爾城陷與防禦佟善等皆力戰陣亡喀什噶爾城圍攻兩月有餘以城中回匪響應穴地道而進遂致不守文員則七品小京官銜陳孝寬以成員派辦文案在城與巡檢陳天錫未入流陳德隆均死之

王鼎銘字新之山東嶧縣人由廩貢官中書除湖南新田知縣道光九年蒞任先投城隍廟誓於神治事甚勤夏旱跪禱烈日中有應以是得民心十二年正月江華搖匪趙金龍亂作湖南提督海陵阿進勦鼎銘慮煽邑搖卽冒雪步歷搖棚戒諭復召搖長曉以國法與教官率紳士練鄉勇以守突聞海陵阿等被戕池塘城卽督衆禦賊城外賊偪甚將往諭賊居民泣阻之或報曰賊至城民驚竄鼎銘朝服坐堂皇待之書於几曰仇我當殺我勿傷我百姓指三尺練曰城亡吾以此死以賊蹤尙遠徐之近縣甯陽桂陽民感鼎銘之能死守集萬人請帶勦於是四路同進賊分隊出斃之無算越日桂陽之臨泰大富等鄉復集二萬人鼎銘身先策馬出城南誓大創之賊突以槍礮抵拒死甚衆先是賊密約邑搖供送藥丸搖未肯負鼎銘不與賊乘夜脅取故火器復烈衆潰鼎銘殿後賊追至大肆殺戮鼎銘四顧慟曰奈何殺我百姓中礮落馬剗兩目身首異地邑人得而攢之越九十二日始改斂面如生鼎銘殿後時馬蹶邑武生鄭奇光以所乘馬授之鼎銘不可強扶而上鞭馬使疾馳回身舞刀捍賊受重創死

之

呂志恆江蘇陽湖人由監生捐縣丞發福建累擢至臺灣府知府道光十二年嘉義縣賊匪張丙等糾衆滋事焚掠各莊志恆率署知縣邵用之分路勦捕用之行至店仔口被戕志恆復帶兵擊賊於大排竹以衆寡不敵遇害先是逆匪輒以貪官汙吏妄殺無辜爲詞帝疑有激變事下福州將軍瑚松額等查奏無據如例予恤方振聲順天大興人由供事選授福建巡檢升嘉義縣斗六門縣丞賊逼斗六門振聲樹柵溶渠率兵勇防堵賊首黃城率匪黨攻撲與署守備馬步衢等協力守禦賊資夜縱火繼擁入柵振聲持刀巷戰戮數賊力竭遇害幕友沈志勇等同死之妻女皆被戕甚慘步衢與把總陳玉威亦同時陣歿楊延亮字菊泉湖南長沙人嘉慶十六年舉鄉試第一成進士用知縣發山西道光元年補趙城縣十五年推升雲南南安州知州時趙城有奸民曹順以治病爲名傳習先天教與其黨謀爲不軌斂錢造械約八月分往平陽府霍州洪洞縣同時起事三月延亮尙未謝趙城任偵得其狀即飭兵役緝之賊知謀泄

卽糾黨潛入城資夜放獄囚焚縣治延亮死之母妻子女及幕友楊成鼎同時遇害事聞詔用強克捷例子恤特諡昭節

師長治字理齋韓城人由舉人捐內閣中書改知縣選浙江上虞道光二十一年再選湖北崇陽蒞任甫百日而及於難先是縣胥役催徵錢漕久爲鄉民害生員鍾人杰金太和等起而包輸納不數年皆驟富與縣胥分黨角立前令折錦元憤不治事一惟胥役所爲致兩次閔漕援巡撫伍長華批牘漕石加徵一斗語製扁送縣毀差房武昌知府明俊務調停姑息於是姦民日肆錦元旋劾罷以金雲門權縣事禽太和置武昌獄勢少戢其年九月長治至人杰聞上游檄捕急疑其仇生員蔡紹勳所譖糾黨數百人篡取之至則紹勳遁入城躡追抵城門閉內外鼎沸長治登城諭不退持竟夜質明人益衆踰缺入大索紹勳不得迫長治申狀言紹勳作亂人杰倡義捕反者並請釋太和時明俊以事至蒲圻距崇陽一日程長治先期遣長子懷印潛出請明俊莅縣鎮撫而明俊急返武昌衆益張長治罵不屈遂遇害妾吳氏及姪女皆自經家丁曹彬被殺時

十二月十二日也人杰以長治始至無可歸罪乃櫜斂而哭祭之言已以報仇倉卒誤戕良吏事不獲已遂據城叛脅衆逾萬陷旁近數縣明年正月人杰等伏誅卹世職弟長鑣官參將於咸豐七年援勦安徽與賊戰婺源之橫槎陣亡王光字字溥泉興甯人以未入流分湖北厯權典史巡檢事治盜有聲補崇陽典史變作衣冠自經死